



崇禎朝記事卷三

九年丙子正月內閣溫體仁奏逮問知縣成德之母辱臣於長安門又持本聲冤於朝上命下德錦衣衛打問已於午門前杖德六十發戍初德爲滋陽令耿介絕俗不善事上官偶處府廳積役府廳怒之揭於巡按禹好善開列多端誣以貪酷致被提問及到京士民俱爲之訟冤長洲在閣時亦言之至是好善再疏直言德係舊輔之私人矣賴上不之罪而德母各處投揭至隨體仁輿訴詈於朝門體仁畏之乃具揭奏聞竟罹重譴至十六年起廢升兵部主事甲申之難母子俱殉節死

曹欽程者以逆案問辟繫獄將十年同案諸人俱已正法獨欽程尙存遂爲獄中牢頭鄙橫無恥每搢紳入獄卽需索萬端成入欽程亦如法索詐成大怒拳毆之數百一無所得而身被傷人皆快之欽程後以闖賊破京釋放卽拜降賊庭從賊西去不知所終

寧夏巡撫王楫馭下少恩一日於教場點兵下操適聞有解到賞軍餉銀軍士遂紛紛求發楫不許比夜楫入城至北門內軍士攔路求索楫命鎖之衆軍遂鼓噪稱亂持刀砍楫氣絕仆地而死事在丙子正月從來邊軍多跋扈當元年甘肅兵變已戕殺巡撫畢自肅矣至是凡再見

淮安武舉陳啟新上獨違時尚疏灑灑萬言其大指則極詆進士之橫縣令之貪至發憤於腐爛蕪儒欲并科目廢之專舉孝廉行漢法跪於午門奏進上方行不測之恩威遂投契上意奉旨以爲敢言可嘉徑授吏科給事中吏部不能執奏舉朝無敢訟言惟劉宗周於條奏疏末及之言啟新言有大而近夸情似要而有挾未可遽定其品一言投契立置清華雖稱一時盛事將如名器可惜何後啟新官諫垣二三年庸庸隨時未有非常建白卒以敗類蒙譏得罪真覺名器可惜也

時有候選庫大使程品疏斥啟新之虛誕欲廢祖宗科目之制

是絕孔孟君臣之脈上怒著刑部提問擬罪其人雖未必端品然此疏則足愧舉朝之容默者矣

命兩京三品以上於進士舉人貢監中舉堪任知府一員五品以下及翰林科道在外兩司知府於貢監吏民中舉堪任知州知縣一員送吏部除授部中先舉在京各官所舉共二百餘員開列上呈命量才選用初旨命卽授州縣正官遂大半以營謀得之及部中類考又復以賄爲高下至有考授丞簿者諸人始各廢然於是

有志者俱不屑就究之亦未能得一人也

劉宗周以特召至拜官工部右侍郎卽上痛憤時艱疏略曰朝廷有積輕士大夫之心自此耳目參於近侍腹心寄於武夫治術尙以刑名政體歸之叢脞廠衛司訊訪而告訐之風熾詔獄及士紳而堂廉之等夷人人救過不給而欺罔轉甚事事仰承獨斷而詔倭日長三尺法不申於司寇而犯者日衆詔旨雜治五刑而好生之德意泯刀筆治絲綸而王言褻誅求及瑣屑而政體傷參罰及

錢糧而官逾貪吏逾橫賦逾逋嚴刑與重斂交困而盜賊滋起總理任而臣下之功能薄監視遣而封疆之責任輕督撫無權而將日懦武弁廢法而兵日驕將懦兵驕而朝廷之威令并窮於督撫朝廷勒限盡賊而行閒日殺良以報級以幸無罪求治愈殷紛更四出致市井雜流咸得操訛抵隙以希進用皇上不過始於一念之矯而積漸之勢釀爲厲階幾於莫可收拾則今日轉亂爲治之機斷可識矣奉旨大臣論事當體國度時不當效小臣歸過朝廷爲名高已閣臣以馬價空匱議捐助宗周獨言不敢懷利以事君并請禁天下之言利者得旨切責遂引疾罷歸至天津知北兵自昌平深入憤甚復上身切時艱疏略曰往日己巳之變有小人起而修門戶之怨自此小人進而君子退中官用事而外庭浸疏人人解體事事規卸文法日繁欺罔轉甚朝政日隳邊防日壞以有今日之禍實己巳以來釀成之也且以張鳳翼之溺職中樞而予之專征何以服王洽之死丁魁楚等之失事而予之戴罪何以服劉

策之死諸鎮勤王爭先入衛者幾何人不問以逗留詰責何以服耿如杞之死今幸以二州八縣生靈結一飽颺之局廷臣若可幸無罪者又何以謝韓爌張鳳翔李邦華諸人之或戍或去豈昔之爲異己驅除者今不難以同己互相容隱耶且皇上惡私交而臣下多以告訐進錄清節而臣下多以曲謹容崇勵精而臣下奔走承順以爲恭尙綜覈而臣下瑣屑吹求以示察凡此似忠似信之類無往不出於身家利祿將聚天下之小人立於朝皇上亦有所不覺矣又言小人與中官每相比以相爲引重而君子獨岸然有以自異故古有用小人之君子終無黨比中官之君子未又及時政最乖者數事以誰生厲階至今爲梗責備首輔體仁謂其大奸似忠大佞似信且引唐德宗之不覺盧杞奸邪爲規奉旨責以此私亂政顛倒是非革職爲民已又上書體仁規其勿蹈江陵分宜之覆轍體仁不省

劉公前後立朝不滿一年而諫草甚多皆鑿鑿名論纏綿懇惻

不減賈長沙陸敬輿也已盡選入名臣奏疏中但擇其切關時事者錄一二於此云

大學士錢士升疏進四箴一曰寬以御衆如天之覆賢愚并包功過在宥大絃毋急六轡毋驟不競不絀世躋仁壽巍巍蕩蕩大哉吾后一曰簡以臨下若網在綱要領獨挈條目畢張無爲守正垂拱明堂執要則逸好詳則荒程書衡石徒蔽章光一曰虛以宅心如鑑斯空妍媸好醜畢獻形容寂然不動感而遂通以意索照億逆填胸鄰鐵市虎載鬼張弓一曰平以出政如衡斯準輕重毋畸衷益必允舜貴執中孔戒已甚救弊矯偏參調詳審畏卒怖始罔或不凜時上已不說未幾遂以論駁武生李璉疏議搜括富戶事去位自武舉陳啟新上疏邀特恩一時長安游棍章滿公車至有徑請召對者武生李璉一疏至欲江南搢紳富戶報名輸官行手實籍沒之法疏下閣票嘉善惡之遂擬刑部提問以進御批改票烏程曰上方欲通言路當以所擬太重耳遂改擬姑不究嘉善曰

此亂本也當以去就爭之卽具疏言此衰世亂政是使亡命無賴之徒相率與富家爲難不驅天下之民胥而爲流寇不止乞屏絕橫議毋使小人因陳啟新之進以言利窺朝廷疏上而璉疏已批下法司提問矣是疏則批云改票原欲申飭通政何相疑至此卽欲沽名前疏已足致之遂請告辭去其官而用其言一疏之有造於生民者大矣

先是有經歷吳鯤化上疏論雲南巡撫錢士晉貪肆烏程卽擬嚴旨行巡按究問回奏士晉係嘉善嫡弟蓋欲借其弟以逐兄皆烏程之機械也旨下而士晉報病故事乃得解嘉善卒以是去

錢已去位御史詹爾選先有疏論陳啟新之用責備輔臣冢宰不能盡言執爭至是復疏言大臣所以不肯言者以不肯去耳今士升肯言矣肯去矣以去就悟明主以氣節風百僚皇上不卽嘉許而疑其要譽耶且天下之疑上者不少矣將卒驕懦日甚聖德恩

禮過渥則疑過於右武穿札與操觚並課人見絀德而齊力則疑緩於敷文免覲說行或疑朝宗大義不值數萬路費之金錢駁問日煩或疑明啟之刑書不當幾番加等之紛亂其君子憂驅策之無當小人懼陷累之多門則知一切苟且之政或拊心愧恨或對眾唏噓種種隱情有難殫述上怒甚命錦衣衛拏問特御門召對面詰問如何是苟且詹曰卽捐助一事也是苟且侃侃數百言抗對無屈且曰臣死不足惜皇上幸聽臣言固可爲今日之用卽不聽臣言亦可畱爲他日之思中璫在旁亦嘖嘖歎服上益怒命繫朝房候旨內閣揭救翌日旨下言本當重處念輔臣申救姑著放了都察院議處初止議罰俸以議語涉誇并處主稿御史張三謨乃改議爲民

上以邊警仍分命太監盧維寧等總監通津臨德等處兵馬糧餉御史金光宸疏請罷遣上大怒於八月十六日召對廷臣是日下午恰值風雨驟至閣臣部院侍立雨中至以袖障雨上召兵工各

部堂入厲聲云而今要練兵買馬製器械諸臣唯唯上云平時都說口子是好的而今卻從口子入了平時都說有兵馬準備而今卻沒有這是恁麼上聲色俱厲風雨聲亦復雜沓久之獨召金來前上云你疏是甚麼主意你們科道官到這時候並不說何利當興何害當除還說這套話光宸云皇上因文武官員無一實心任事所以有這番委任但這些事體別有委任文武官員一發好卸擔子上厲聲云事到如今你們文武官員可羞可羞金云臣巡按河南時見皇上罷撤內遣以爲是聖明第一美政語未完上卽云不要是這等說連說數聲金又將文武官員話頭申說一徧上云本該重處以後再有這樣的定要拏問徐云該部議處諸臣仍賜茶果而退

以張元佐爲兵部右侍郎鎮守昌平同時遣內臣提督天壽山者皆卽日往上語閣臣曰內臣卽日就道而侍郎三日未出何怪朕之用內臣耶閣臣默然是年昌平陷乃內臣納假兵而起爲內應

者

命調各鎮兵入援總兵劉澤清至河閒擁衆不前疏言東撫李懋芳格標兵不發上怒下部議懋芳革職其實標兵三千而劉兵萬餘不相涉也自此以後總兵非復督撫可制而澤清更爲跋扈云至壬午之警王永吉爲東撫陷至七十餘城而以兵僅三千爲上所原反得升薊遼總督不知三千兵從來如此當時撫臣所值有幸有不幸也

本兵張鳳翼自請以身當敵督援兵出師而以舊本兵梁廷棟爲總督梁由南至張自京出北兵至雄縣而返徧蹂畿輔破數十城二人俱尾其後而已北兵將出沿途刮樹大書各官免送四字二人度敵退後且罹重罪因日服大黃藥取瀉求死北兵以八月十九日出口張以九月初一日卒又數日梁亦卒後下刑部議罪梁議斬張免議以烏程之庇故時謂張死亦不幸矣

北兵入至天壽山將諸陵寢殿拆毀兵退後撫按奏稱忽有怪風

從東北起祖寢門扇海馬獸頭神路樹枝悉行刮損有旨著估價修理上下相蒙不復究竟而閣臣反以事平敘功加恩時新三參句容孔貞運江夏賀逢聖南海黃士俊俱加太子太保

邊警時適當鄉試屆期遂停不舉至事平後改十月初二日爲初

場

日揭曉

誠意伯劉孔昭疏論倪元璐素制當黜借明綸以媚婢嫡妻陳氏見存而王氏居然冒封許重熙僞士非祖敢居下以訕上實錄未成而五陵注略先刊行世益體仁乘文何二相旣去以倪爲二相臭味必欲擠去之而後快言路部僚莫有應者因以京營總督缺誘劉孔昭令之出疏奉旨下部看議倪前妻陳氏有故而去再娶王氏皆名家女非以妾冒封竟坐冠帶閒住議許除名禁錮不足明罰宜下法司窮究體仁擬旨三上不允徑批許重熙著斥革後孔昭不得京營缺特復操江缺以償之孔昭前此已參戶尙侯恂以媚溫矣

時上銳意取法世宗命近侍徧買坊閒刻本如見聞錄等項適注略初刻亦買進登御覽中有誠意伯襲爵事頗致譏貶上覽而賞之孔昭聞而懼遂因參倪疏而并及故閣部俱議窮究上終不允云當時謂倪爲今之韓愈許乃得與之比類同毀耶人之視許已不輕矣許後年將大耄猶畱心史事下榻荒齋者三年蠅頭小楷手不絕書惜未竟其事而齋志以沒也

黃景昉主北闈試以馬之驥爲解元下第者吹索字句投揭陳啟新出疏參之景昉辨疏言吏科無衡文之責啟新非能文之人上以御筆塗吏科句意可知矣部議竟以覆試文字不雅議罪停四科削景昉級其逢迎啟新如此

方流賊蹂躪中原官兵攻之總兵曹文詔斬獲獨多然以勇而驕爲賊所陷沒升盧象昇總理五省孫傳廷巡撫陝西與三邊總督洪承疇協力勦賊孫久居邊疆習行閒事盧身先士卒忠勇有爲率關外兵一再破賊而孫洪亦時時以捷聞時闖王已誅蝎子塊

已爲盧追逐入秦河南稍寧自羣盜擾河南北者三年夾河千里雞犬無聲賊卽無可掠盧又合大軍於中原羅而蹙之寇已稍衰及以邊警調各兵入援事平卽改用盧爲宣大總督洪爲薊遼總督而寇復蔓延矣老回回等盤踞鄖襄閒休糧息馬秋高足食乃以全軍合曹操闖塌天諸賊兵二十萬沿江長驅而下斬黃六霍懷寧望江江浦所在告警烽火且及儀揚已自尉氏至登封至汝南復入河南豫撫陳必謙輕撫被誘幾以身殉爲按臣楊繩武糾劾解任削職以王家禎代之兼總理川湖山陝督勦事務後亦以無功而罷

邊將祖寬勇敢善戰滁州五里橋之戰殺賊近萬人總理盧疑多平民雜其中有無辜之歎祖大怒盧以異語謝亦不能釋然後洪調祖入陝勦賊祖擒闖逆高迎祥并其妻以獻其部下李自成收其餘衆復自稱闖王闖部下有張獻忠者榆林人初號黃虎至是自稱八大王而天下事自此竟盡於二賊矣

山西巡按張孫振參學臣袁繼咸婪肆贓款有旨拏解來京究問兼責撫臣吳姓何以薦劾互異吳回奏言繼咸清公自矢學行兼優舉薦自出公論繼咸到京因疏訐按臣之徇私屬託事事有據三晉士民亦羣爲袁訟冤上察其誣命復繼咸官逮孫振下獄問遣後繼咸官至江廣總督國亡被獲全節而死可謂不負上恩矣孫振以南渡時諂附馬阮復官御史謀翻逆案誅鋤正人與袁弘勳同爲一時之巨憝云

左都唐世濟疏薦霍維華邊才戶科宋學顯糾之奉旨逆案中人不許舉用屢有嚴旨唐世濟乃敢借邊才薦舉大臣如此欺蒙小臣如何底止著革了職刑部提問吏部謝陞因奏憲臣謬薦匪人臣在病榻失於查參蓋二人原同心阿附首揆薦維華原出體仁意使世濟先言嘗試陞僞爲不知其狡如此及奉嚴旨問罪遣戍體仁亦憚上威不能爲之地謝亦以此失上眷去位矣未幾福建巡按應喜臣薦地方人才中及逆案中之周昌晉因大理寺副孫

杰疏劾亦命逮喜臣問遣刑部王都又劾侍郎章光岳在通政時請逆案中有枉者辨疏許其封進御史水佳胤有疏請吏部將逆案中有不平者明告二人皆當究處部覆光岳引退佳胤以別事處免議都又劾吏尙田唯嘉當王永光借題邊才唯嘉卽薦楊維垣賈繼春二人光岳薦呂純如霍維華傅樾徐揚光虞廷陞葉天陞六人夫世濟喜臣薦一人而拏問薦二人六人者宜何居時田方新經簡任眷遇正切召對出疏示之諭不必置辨

蘇松學臣倪元珙回奏據道臣馮元颺知州周仲璉申文大約言復社之士文行相先並無把持武斷之事陸文聲作奸犯科憲檄拘提逋逃在外懷恨入都借復社發難耳有旨復社結黨恣行所關世道人心不小倪元珙徇州道申文扶同誇詡都著議處元珙等各降調是時復社主盟首推二張張溥張采銳意矯俗結納聲氣閒有依附借名者未免輿論稍有異同烏程當國因惡諸正人欲爲一網清流計正思借題生事文聲本一無賴見陳啟新之拔

崇禎朝事三
用遂效尤建言希圖進身故借復社爲題迎合政府而蘇州推官周之夔業以漕事罷官恨及二張亦疏訐復社生徒妄立四配十哲名目濁亂一時皆溥采爲之倡政府徇其意皆票旨嚴究大開告訐之門同時又有常熟奸民張漢儒奏訐錢瞿二宦事

張漢儒者常熟邑民奔走於諸大家爲門幹後又投充糧衙書手以事犯革逐并不容於鄉里不得已棄家入京遇有同邑陳履謙亦以事犯在京出入摺紳之門因相謀議欲訐奏豫撫陳必謙暨鄉紳數人以報怨而錢謙益瞿式耜二人爲首輔深仇遂草成奏疏開列多款先於朝房呈之體仁體仁首肯顧其注毒在錢瞿且恐人多則啟上疑因去陳與紳而止參二人投通政上之體仁竟擬嚴旨著撫按提解且以不行糾參責令回話既下刑部究問贓款又發撫按詳鞫屢問屢駁株連不已虞山因營謀求解於曹璫曹故王安名下也以所作安碑文爲證曹覽之泣下乃盡力爲之營救而陳履謙復獻詭贓出首之計先

具一匿名揭有款曹擊温等語隨令王藩出首云虞山齋四萬金託周應璧求款於曹烏程卽具密揭入奏上以其揭示曹曹懼甚自請窮究其事先是衛帥董琨逼供招以匿揭爲根據以王藩爲確證應璧堅執不認董琨逼勒成招事頗昭著曹璫奉旨嚴究大加搜訪備悉履謙父子奸狀擒到廠衛訊問招出漢儒草疏王藩出首并伊父子捏造款曹擒陳和温六字又改和爲擊等情歷歷有據獄上張陳王俱廷杖一百立枷死烏程亦放歸蓋由曹盡發其奸知漢儒之疏匿名之揭王藩之首皆其主謀前此總憲薦霍謀翻逆案尤其指使也烏程每興大獄必稱病以聚謀謀定而後出是時修理湖州會館方擇日移居疏上邀宣諭卽日出矣淄川已票畱御筆書放他去閣票有人夫祿米等項御筆抹去疏下出不意方食筋失人心稱快錢瞿旋各坐贖徒去

烏程既去又復枚卜絲竹劉宇亮進賢傳冠升禮部尙書韓城薛

國觀原左僉都御史升禮部侍郎各兼東閣大學士旨云著與輔臣至發協同辦事不稱首輔有與至發密者勸且稱病至發云無奈賤體頗康直至半年後一日偶有宣賜稱首臣至發遂即日廷謝編修吳偉業疏言願至發以體仁為鑒體仁學無經術則當練達朝章體仁性習諂諛則當矢志光明體仁狎暱小人則當嚴杜諭訛體仁護持逆黨則當力褒忠孝毋效其泄沓偷容毋似其游移飾詐近日辨揭盛稱體仁之美曰孤執曰不欺夫體仁有唐世濟吳振纓之徒參贊密謀有陳履謙陸文聲之徒驅除異己何謂孤庇樞貳則總理可不設而事敗乃設何謂執必因私踵陋盡襲前人所為將公忠正直之風何以復見也

南祭酒許士柔以撰原任左都高攀龍贈官誥命為輔臣張至發糾其違式命降二級調用故事兩制專屬詞臣而贈官誥文則誥敕房中書據為職掌大臣子弟欲表章先德以中書撰文未盡善也每請詞林名公為之崇禎初元褒贈死難諸家誥文盡出詞林

手獨高忠憲誥文雖作而以軸缺未領至是已八年矣其家請補給仍錄許原撰文以進時已奉旨申飭不許用駢語煩文中書官遂挾摘其制語獻之中堂至發以許為倪黃之同年友方為時忌正欲引繩批根特揭參之遂奉嚴旨忠憲誥命亦遲回不敢請矣大司寇鄭三俊給諫何楷各疏言上自處撰文違式者耳非謂高攀龍之清忠勁節有煩擬議也始得旨另撰文補給

東廠緝獲福建泉州府吏員許馨來京打點為興泉道曾櫻謀升浙江按察司中央考功葛主事文選來郎中說分上有元寶八錠奉旨各犯下鎮撫司嚴究曾櫻革職逮問曾歷官清執忽有此事眾共疑歎御史葉初春為訟言之撫按亦為之稱冤漳潮總兵鄭芝龍疏櫻廉明公正龍感其德代為之營升其實與櫻無干願以官贖罪上已鑒悉准令櫻復官起用芝龍圖功自贖

鄭芝龍福建南安人其父故泉州府吏也曾受知府蔡善繼恩芝龍聚眾雄行海中時浙有李魁奇廣有劉香與芝龍為三蔡

再起爲兵巡道以巡撫熊文燦命招撫之芝龍以蔡故屈意投降題授副總兵鎮守漳泉惠潮地方魁奇爲香所誘犯浙江及南直芝龍用計擒斬之香亦相繼爲芝龍擊敗走死特起楊嗣昌爲兵部尙書時方守制疏辭不允令奪情視事舉熊文燦爲四省總制專勦流賊文燦撫閩以招鄭芝龍成功至是亦主議撫張獻忠等遂詐降投誠文燦信之授之以官獻忠跋扈愈甚劫殺自如撫議卒敗文燦遂以庚辰年伏法死河南巡按張任學疏云臣書生也於龍威丈人之祕雖無所窺而以二十五年之學問爲皇上練此勘亂之經綸以答祖宗養士之報誠自信於中矣皇上不以臣爲不肖乞下部院集議將臣改爲總兵官行當四征寇虜雪國恥而復生民之仇云云奉旨下吏兵二部都察院集議以爲御史改總兵實從來未有之事請仍以監軍御史兼署總兵銜爲便聖旨以任學忠勇可嘉准改授署都督僉事充河南總兵官

按張係乙丑科進士四川保寧人由知縣考選御史先巡鹽浙直再差巡按河南自請從戎可謂慷慨直前之丈夫或者謂其本欲謀得巡撫故請從戎不知此時中州撫缺人皆視爲畏途竟可不謀而得何必改武銜然自改任後仍未見有殺賊奇功竟以失事逮問亦見當日任事之難矣

上以任邱清苑涑水遷安大城定興通州各有司不法命逮問責撫按不効爲溺職先是有固安知縣秦士奇撫按遣官奉旨搜私宅得銀七百兩坐贓論戍大同僉事劉彝鼎因撫臣薦疏批旨云彝鼎貪污狼籍著會同監視參來重處遂逮問遣戍蓋皆由中璫毀之也自此外任官皆不得以調停大璫爲事矣先是丁丑年又有潘益達白慧光皆近畿縣令中旨命御史參奏提問

十一年戊寅二月初七日皇太子出閣講學閣中先期題侍班官四人姜逢元姚明恭王鐸屈可伸講讀六人方逢年項煜劉理順吳偉業楊廷麟林增志校書二人楊士聰胡守恆侍書二人中書

朱國詔黃應恩舊制日講官東宮講官無相兼者恐上與東宮同日御講筵不能兼也且應恩既充正字又充侍書皆以至發不諳衙門規例故爲應恩攘之耳項煜楊廷麟各上疏願讓黃道周奉旨不得矯讓至發揭辨云道周清品意見少偏如近疏有不如鄭鄭語夫杖母何如人而自謂不如是可爲元良輔導乎時鄭獄尙未成草此揭者應恩也給事馮元飈疏言道周至清無徒數忤執政項楊二臣退然自下爲大臣者正宜嘉歎而至發一揭大不快其言并遷怒道周何也至發出揭辨又上世風宜挽疏累數百言內云道周出山緣愛母之心借一言以周旋鄭鄭豈曰非孝但不宜以朝廷是非之公爲一己環草之私又云有一二人焉建壇坫執牛耳自命於人曰吾將主持世風已而自命者與之附者入主出奴了不得其何緣何故末又請禁投刺往來自今士大夫門盡可羅席盡可塵夫人而能爲廉也夫人而能爲讓也終推重於溫體仁頌其孤執不欺竊願學之云云或言此疏亦出應恩代草者

本兵楊嗣昌之父鶴以三邊總督逮問遣戍至是寧夏敘功復官給誥命舊例贈卹誥命中書撰文章者爲之應恩爲楊鶴撰文極力洗發進呈上塗抹發下令查職名議處淄川欲上公揭申救孔句容曰去年許士柔事正與此同彼時未申救今奈何救之淄川憤曰難道閣中少得此人我自救之連上三揭上不允御批云撰文自注職名新經申飭應恩供役閣中首先違玩人臣功罪各不相掩蒙冤等語視當日處分爲何如應恩著革職爲民嗣昌亦上疏救不聽既而大理寺副曹筌疏參首輔并應恩納賄諸事件奉旨首輔素矢清慎何得牽詆應恩刑部提問

鄭三俊爲刑部尙書適當科臣宋之普以馬豆事參戶部尙書侯恂下獄先有讒言謂三俊與侯恂皆東林契友必且屈法徇私上入其言獄上果多爲恂卸罪上大怒并三俊亦下獄宣大總督盧象昇先具疏稱冤盧昔爲鄭司屬素服其清公者也繼盧者不下十餘疏應天府丞徐石麒疏尤剴切閣票回話發改閣票爲民又

發改閣票提問御批云可將三俊罪狀一一講明不必更處奏事
官閣中擬旨進卽批出

時當考選行取官概集推敲詞林臺省雖據官評而亦別有營私
者陳啟新疏論其事奉旨據實回奏又旨下吏部將訪冊進覽特
處圈多濫徇者卿貳中姜逢元王業浩閒住科道中傅元初等六
人閒住孫晉等三人降調劉含輝等十一人降級照舊啟新回奏
指涇縣尹民興江都顏胤紹及同鄉預定之陸自嶽部覆各降處
田唯嘉乃請先推部屬所推二十二二人輿論譁然與推者各懷不
平獨成勇恬然無怨色不數日辭朝赴南京吏部任去矣

二月十一日御經筵畢召詹翰諸講臣顧錫疇等二十餘人問保
舉考選二者孰爲得人諸臣各以大意虛對黃景昉獨以鄭三俊
下獄及朱天麟成勇不得與考選對上細訊良久諭以三俊蒙徇
徒清亦不能濟事至成朱二人則李建泰以下同聲爲之稱屈上
命起序立有言者獨奏諸臣各陳所見上曰言須可用如先年講

官姚希孟欲將漕米改折一年這箇行得行不得楊廷麟奏自溫
體仁之薦唐世濟王應熊之薦王維章今二臣皆敗而體仁應熊
無恙是連坐之法先不行於大臣欲求收保舉之效得乎上爲色
動久之無所言項煜乃奏成勇不得考選以任濬爲閣臣至發兒
女親家前任濬列第二後以有議以成勇易之閣臣不欲勇獨得
考選若得則俱得失則俱失云爾上曰誰沒有兒女親家也不在
此至發奏請救撫按勘臣與濬結親或見在或已往有一於此則
治臣罪上諭以不必與辨對畢出次日黃道周余煌黃景昉楊士
聰各有疏而田唯嘉亦有疏直攻楊廷麟云成勇輩各爲同鄉所
引臣一旦推之部屬安得不觸諸臣之怒廷麟以推部之涂必弘
係江西人特借成勇天麟爲口實耳至聶明楷係伊同鄉萬穀春
保舉臣且參革并穀春降處是以恨臣以保舉考選爲不公也奉
旨接引主持有何憑據且原奏爲黃景昉何訛爲楊廷麟還著明
白具奏十六日御日講面諭景昉昨原切責鄭三俊豈是矜亮又

諭余煌昨諭有姚希孟全折漕糧一年之語煌對行不得此數語如何不載又越日御門畢諭百官數百言內言鄭三俊一案屯豆牆穴情弊顯然有何可疑而欺罔推諉巧爲彌縫屢奉批駁孰法愈甚但念別無贓賄姑著回家聽擬蓋聖明本樂受言特不欲恩歸於下耳

姚宗典曰凡日講講章附論時事一段猶臺省之條陳也先文毅進講在乙巳庚午閒時入夏始兌糧阻凍開河須待來春始得交納京倉較之祖制十二月兌糧二月開幫五六月到京交納七八月回空何啻天淵偶引及之或不妨改折一年以通其窮亦作商量語耳若使斯言果拂聖意亦必面賜譙讓如余煌矣乃歷庚午至壬申直講又三年蒙恩如一日何旣賞之於生前反繩之於身後蓋當時請卹伎先臣者實多以例無可駁乃摘其講讀之謬駁之冀以此斥先臣也

王維章所至以貪墨著備兵西盃以剋削致軍變應熊力護之

舉爲四川巡撫至公然形之揭奏云維章臣畏友益友也等語及四川復以賄敗時無敢言之者

楊士聰回奏疏下又參及史堃巡按淮揚署巡鹽事侵匿課銀二十一萬有旨著回話堃奏臣孤立寡援屢奏奸惡向年文震孟姚希孟爲詞臣之雄死者死矣震孟借虛名以入閣入閣便行私去後復草疏募成德代上曾有綫扉之綫索一斷議論之風雨寂然二語故士聰借考選之事硬以綫索二字誣陷臣也士聰復上聖主神明燭弊疏列惟嘉納賄事款奉旨提其家人下錦衣衛究問惟嘉旋以此去已又逮其子敬宗下獄同家人田登第等俱問邊衛充軍仍追贓充餉

南科張焜芳復疏參史堃巡鹽贓私狼籍等事御批云史堃鹽弊多端比匿攫利大干法紀與汪機俱革職并吏承吾俱拏解來京究問堃以十月十二日得報隨卽赴京潛入薛國觀寓謀定乃投獄上疏辨謂昔年以參劉鴻訓錢龍錫爲朋黨構陷并及楊士

聰馮元颺諸人又言焜芳爲中書炳芳之兄向來旨意洩露皆炳芳爲之疏下閣擬票上發改再三最後擬楊馮俱革職焜芳提問上不許御批云不欲牽累多人乃票焜芳革職候訊止提書吏余伯和問此疏實出黃應恩構造欲設謀相陷也堇奉旨行查後巡鹽太監楊顯名爲之彌縫惟於交際六萬兩則云臣不能爲之諱以故堇久稽獄中未幾邊警至此案遂不結堇竟憤死而事始釋張至發因曹筮疏參連疏請勘奉旨卿連疏請勘心跡愈昭何足與辨云云張乃上疏求罷云臣佐理無能當去諧世無術當去竊位妨賢當去一去而揆地清羣構息朝議不至紛紜天憲不至屑越媿媿百言終篇無一病字昔所謂賤體頗康者於此疏見之奉旨有回籍調理語時人傳笑以爲遵旨患病云然以首臣去位成例而百金之賞半裁行人之送復罷揆席漸輕往規又一變矣張去而孔爲首至六月亦卽放歸票旨亦同僅賜路費五十金彩段二表裏而已

四月十二日上御經筵畢召對六部問邊事本兵楊嗣昌奏有善戰者服上刑等語上諭曰此是孟子言六國兵爭事今大司馬彰九伐之威當明春秋大一統之義奈何云云隨戒以今後勿復爾時上聲色俱厲又言楚撫余應桂用將官事嗣昌言應桂任御史時曾有疏參臣父臣今不敢以私心駁其所用之人先國家之急而後私仇也未幾嗣昌入閣應桂就逮其轉移甚祕人不得而測矣

二十八日上御中左門召候考諸臣親賜策問勦寇需兵養兵需餉屯鹽采鑄難取近效搜括加派民力已竭將何策以處此又口口抵邊不犯而退是何狡謀各悉心以意見條對欽定取曾就義朱天麟等五員爲編修張縉彥汪偉等五員爲簡討王調鼎熊維典等一十二員爲給事中李嗣京等二十六員爲御史閻嗣科葉樹聲林蘭友詹兆恆爲南道御史其餘并授各部主事時沈迅張若麒但授刑部蘇壯已升同知成勇升南吏部俱先出京不與考

旋以涂必弘言拔成勇爲南御史後以論楊嗣昌奪情入閣革職
逮問越數日上又傳諭吏部將會就義等條陳擇可行者各酌議
具覆曾就義江西人作縣頗著清名對策中言百姓之苦皆由吏
之不良使守吏盡廉卽稍從加派以濟軍需未爲不可上喜其說
遂擢第一入詞林未幾卽有練餉勦餉之加

五月火星示變上於宮中齋沐祈禱青服減膳并諭各衙門素服
修省樞臣楊嗣昌時方倡款議遂借星變援引前代事疏奏云云
科臣何楷疏駁之云嗣昌引建武款塞故事欲借以伸市賞之說
也引元和宣慰故事欲借以伸招撫之說也引太平興國連年兵
敗故事欲借以伸不敢用兵之說也其附會誠巧至永平二年一
條所述皇后馬氏等語更不知其意所指斥何在且前言后妃後
言陰教一篇之中三致意焉是何爲者也得旨不必深求是時傳
田貴妃與中宮不相能上亦久不見中宮故嗣昌疏中隱伏挑激
語爲何疏奏破嗣昌遂有辨疏其詞甚危而於市賞招撫之說絕

不一及蓋前召對善戰上刑之說其機括已陰轉矣說者謂楊之
大用實借徑於田貴妃以後有悼靈王事嗣昌疏請持誦華嚴經
時方在楚中督師僅隔旬日而疏至益信其交結有自云

六月十八日召府部卿寺院官集中極殿考閣員親命題云天象
頗仍今年爲災甚烈金星晝見已逾五旬四月大雪凍斃人畜朝
廷腹心耳目寄託臣工有司舉劾尤易起枉直難分寇尙未滅
勦局難更□□生心邊餉久欠民貧旣甚正供猶難侵剝旁出如
火益熱至操守清謹者又多自傲遂非須處置得宜禁戢有法卿
等忠能體國才足濟時其悉心條對先因會推三次俱不愜上意
至是拔兵部尙書楊嗣昌戶部尙書程國祥禮部侍郎方逢年工
部侍郎蔡國用大理寺卿范復粹俱入閣辦事嗣昌仍帶管兵部
事尙在制中也當日與對者三十餘人天方大雨對畢命題已近
一鼓多草草了事蓋上意已定特以考爲名所最注意者獨嗣昌
程則以房號蔡則以牙石二事得上心范與方不過其攜帶者耳

房號者借合京賃居一季之租及天下會館住者亦出修理若干初謂可得五十萬其後戚畹勳臣巨璫概從隱匿所得僅十三萬而已牙石者崇文宣武兩大街列之於中以備駕出而除道者時培修外羅城不及取石蔡建議用此然用力艱而工費浩所得不償所失也二臣之受知止以此

宣大總督盧象昇疏報丁憂上命料理候代員缺該部速推有不拘在籍守制之旨因推陳新甲往代時新甲亦在制中嗣昌欲援以自解也於是詹事黃道周連上三疏其一言天下無無父之子亦無不子之臣衛開方不省其親管仲至比之玃狗李定不丁繼母憂宋世共指爲人鳥今遂有不持兩服坐司馬堂如楊嗣昌者自有嗣昌而海內無行蒙垢貽禍其親者皆擲塊投杖思攘節鉞之柄今盧象昇搥心泣血以俟奔喪又忽有并推在籍守制之旨夫使守制者可推則是聞喪者可以不去也聞喪者可以不去則是爲子者可以不父爲臣者可以不忠也夫人遺其親必不利其

君壞於家必不成於國嗣昌在事張網溢地之談疑市樂天之說才智畢覩矣更起一不祥之人予之表裏指鼻指鼻說夢捕風猶狼狽之獸倚肩並走亦何益於負重乎其二疏言頃會推陳新甲聞其丁憂猶未終制而又聞其走邪徑躡捷足天下卽甚無才未宜借及此也凡論人才難則知其所易批龍鱗之難難於履虎尾冒斧鑕之難難於冒鋒鏑今諸負氣節敢直言者半棄不錄欲使諸輒美容說者叩頭折枝以建非常之功豈可得乎古亦多有忠臣孝子無濟匡襄之用者決未有不忠不孝而可進於功名之門者也天下卽無人臣願解清華以執鎖鑰何必使被林負塗者祓不祥以玷王化哉其論遼撫方一藻引隆慶通市故事今日情形之不同者有五事之不同者亦有五卽款已成矣以視靈錦遵薊宣大之師何處可撤者而謂款□之後可撤兵以討寇乎因又言兵之不可撤者有十乃諸臣其爲款局陰設不得不款之情恟疑聖衷陽設不得不款之形搖惑衆志遵撫旣無成謀而內受算於

樞臣樞臣又無成謀外受算於遼帥三窟分營鬼技千出不幸而成則逃管於朝夕之間貽釁於三年之後掠蟒玉以賒膏斧幸而不成則委過朝端謬稱築舍安受禍敗以自爲是是豈臣子所爲乎是時內外合謀已陰遣瞎者周元忠往來商此事矣惟此一疏始盡斥之

七月初五日上召對廷臣於平臺先召吏部署侍郎商周祚侍郎董羽宸責以會推閣臣多濫徇次召兵部署侍郎許世蓋諭以備邊要多備儲糧再次召兵部楊嗣昌問邊報各路情形嗣昌對此時或無大舉又問流賊情形嗣昌對洪承疇用兵久漸有成效孫傳庭亦有才用兵動支屯課不待勦餉尤爲難得次召刑部尙書劉之鳳侍郎王命璿諭以刑獄之事只是情法理虛公慎又諭獄情宜速通保候各犯宜速審結次召工部尙書劉遵憲侍郎李覺斯諭以南外城等工宜速完次召都察院左都鍾烱僉都徐爌諭以考核諸御史宜嚴會頒憲綱未見遵行次召少詹事黃道周上

曰朕幼而失學長而無聞時從經筵中略知一二無所爲而爲之謂之天理有所爲而爲之謂之人欲爾三疏適當枚卜不用之時可謂無所爲乎道周奏天人只是義利之辨臣三疏皆是天下國家綱常名教不會爲一己之私所以自信初無所爲上曰前月二十八日推陳新甲何能當日成疏且說阨於時會何也道周奏因同鄉御史林蘭友科臣何楷皆有疏恐涉嫌疑上曰今遂無嫌疑乎道周奏天下綱常邊疆大計失今不言後將無及上曰清原是美德但不可傲物遂非如伯夷是聖人之清若小廉曲謹止叫廉不叫清道周奏陳文子不能強諫大節不可觀夫子說他清而未仁夷齊大節可觀所以說他是仁上曰你說仁智勇就是清任和亦多牽強道周將仁智勇誠明之義辨說一番因言綱常名教禮義廉恥皆根本上事如無根本豈做得事業奏未畢輔臣嗣昌出班跪奏道周論臣止爲奪情起復原非常理臣曾具疏再辭若綱常二字臣不敢不剖明白君爲臣綱父爲子綱君臣還在父子之

前古來列國君臣可以去此適彼今一統君臣爲臣子者無所逃乎天地卽臣父母皆受君恩而無所逃臣又逃於何所祖宗朝非其人不奪情臣控辭不獲命意詞臣中必有博通經義者可以代臣力言回天聞道周爲人所宗意必有持正之言今謂不如鄭鄭臣始歎息絕望鄭鄭杖母禽獸不如道周又不如彼還講甚麼綱常道周奏大臣聞言義當退避未有跪在上前爭辨不容臣盡言者嗣昌奏臣爲綱常名教不容不剖委屬非體望皇上用道周而放臣上曰這疏也不爲奪情近日人情各有所爲道周奏臣爲一人之私只用緘默自取富貴何苦與他對辨上曰你無端污詆大臣又以大題目說他不得不辨道周奏臣與嗣昌比肩事主比不得詆毀大臣臣自少讀書於今五十年無一事不可對君親上曰旣如此何以又說不如鄭鄭道周奏臣原說文章不如鄭鄭上曰你說陳新甲走邪徑躡捷足何爲邪徑疏中輒美容說叩頭折枝者是誰道周奏人心正則行徑皆正邪則行徑皆邪新甲在蜀中

聞命辭謝往復須八九月不得來盧象昇又不得去嗣昌在司馬堂則可政府則不可嗣昌一人爲之則可呼朋引類使成奪情世界則不可上曰朕正要再問鄭鄭五倫皆絕許曦等說他罪狀甚明雜職到有公論道周奏臣若有心功名富貴只當附和說鄭鄭不孝豈不能取說正是臣無所爲古今獨立敢言之人少讒諂面諛之人多故臣不得不言上曰少正卯當時亦稱聞人心逆而險行僻而堅言僞而辨順非而澤記醜而博不免孔子之誅今人多類此道周奏少正卯心術不好臣心正無一毫私上曰前以爾偏激稍示裁抑後聞操守隨卽賜環前日暑天仍成一篇文字才亦可愛不圖這樣恣肆道周奏臣今日不盡言負陛下陛下殺臣則陛下負臣上曰你說的都是空話一生學問學得這張佞口起去罷道周叩首起復跪奏臣還將忠佞二字奏明人臣在君父之前獨立敢言者爲佞是在君父前讒諂面諛爲忠耶忠佞不分邪正不明矣何以致治上曰不是輕易加你佞字說你這邊便遁在那

邊非佞而何若論紅牌轉換支吾就當斬道周起諸臣各叩頭上
又召面諭曰朕不才不能感發公忠爲國之道不智不能辨別是
非邪正不文不能宣布德化不武不能削平禍亂凡此皆朕之寡
昧卽朕之愆尤關係國運世道人心今一等機械存心的專於黨
同伐異假公濟私纔簡用一大臣百般詆毀律以祖宗之法當何
如今口寇邊易治衣冠之盜卻難除以後再有這等立置重典閣
臣以下皆承旨退道周降五級調外任
同時疏論嗣昌奪情者自何楷林蘭友外又有修撰劉同升編修
趙士春皆奉旨降三級調外用南京兵部尙書范景文等公疏請
允嗣昌守制召還黃道周何楷等上責其朋黨把持查主稿何人
景文再疏認罪命削職爲民南道御史成勇疏言臣見嗣昌疏有
仁不遺親義不後君之語反覆辯論無非避不忠不孝之名是嗣
昌猶知有君親猶可以忠孝之言告也今卽就其言詰之嗣昌謂
古之君臣列國之君臣可得而避今之君臣一統之君臣無逃於

天地之間是三年之喪可行於古而不可行於今不知嗣昌所引
者何古所指者何臣所據者何代之經何國之典豈非聖諭所謂
另一邪說者邪信如其言是凡爲臣者皆不當終三年之喪終則
爲後君爲不臣先聖之詩書可焚先王之典禮可廢不舉人類而
爲禽獸不止也上責其黨同伐異命逮問

先是道周疏御筆票輕處嗣昌懼其復用也急募張若麒上疏
言道周飾六藝以文奸言務在假託道理以把持朝廷顯行其
呼朋引類之計又有老魔之赤幟旣拔山魃之穢態難藏等語
未幾若麒遂以刑部改兵部矣至壬午年寧錦告急若麒奉命
閱視遑臆催戰以至陷沒甲申闖賊之亂若麒屈膝投誠得授
僞官其人本末如此可見矣

張若麒旣營求嗣昌調部有日矣御史涂必弘忽出一疏言刑部
所司民命而人都厭薄之是以司官強半皆鄉科任子偶有一甲
科輒調別部豈司民命者當專用不肖乎請著爲令刑部官不許

崇祿朝前事三
更調奉旨申飭若麒麟憤無所洩乃出平賦役疏謂鄉紳隱匿賦稅遺害小民內有鄉紳豺虎等語有旨鄉紳豺虎等語據實回奏若麒麟乃指莊應會范良彥袁弘勳奉旨俱行撫按逮問若麒麟初意因與同鄉高弘圖爭一莊田構怨將指及之或告以弘圖立朝大節忤璫去位萬不可誣誣之必於若麒大不便不得已乃以三人充之袁范皆巨惡袁尤逆黨護局之魁也然張之爲此實涂疏激之使然涂與楊廷麟同鄉同年遂疑楊實使之後與嗣昌比所以修怨於楊者不可解矣

戒諭皇親駙馬不安分義受投獻霸佔者許科臣糾參又諭周奎田弘遇袁祐尤非他比宜先率禮爲諸戚臣倡袁與田係貴妃父也袁妃居翊坤宮田妃居承乾宮袁僅生一女寵愛去田遠甚祐亦謹畏與弘遇相反弘遇好結納搢紳皆樂與往還承乾鋪設皆弘遇外備古玩時器及壁閒字畫無不精好妃又洞曉音律管絃琴弈色色皆工閒侍上鼓琴聖情說豫上因誇於國母曰后獨不

能此乎國母正色對曰妾本儒家惟知蠶績且曰妃從何人授指法上色勳妃自言妾母所教遲數旬妃母入宮實能鼓琴上意始

解

武清侯李誠銘慈聖太后神宗生母內家也上以國用匱乏爲憂閣臣辭國觀首謀勸借言在內惟戚畹非上獨斷不可因以武清爲言遂傳密旨借四十萬金李氏初不在意督之日急武清死督其子國安國安死提其家人追比房產俱行入官有一女子字嘉定伯之孫嘉定請命於后后云人當急難自無絕婚理但取此女歸勿攜帶一物也諸戚畹合詞請寬不允戚畹遂人人自危後因皇五子病亟有九蓮菩薩下降之語又見慈聖於空中上大悔悟諭停追比復武清侯爵房屋祿米仍頒給焉

上初年崇尙天主教徐上海教中人也既入政府力進天主之說將內殿供養諸佛像毀碎至是悼靈王病篤上視之王指九蓮華娘娘見立空中歷數皇爺毀三寶之罪及苛求武清云云言訖而

薨上乃痛悔前事頒諭內外有但願佛天祖宗知不願人知等語
幾不成皇言時閣臣皆從外入不諳文義宰相須用讀書人初年
會舉以諷諸臣至此何乃懵然

樞臣楊嗣昌上四事機宜疏請於卿寺科道等官不拘常格推補
臣部侍郎其久推不至者俟其到日於別衙門填補蓋指惠世揚
吳甡也末云職官一司紊冗之極時設協理員外分任其勞而余
爵久推不至請武選主事孫嘉績升補而車駕主事漆嘉祉等到
任無期請敕吏部題沈迅調武選張若麒調車駕沈既調卽上疏
條陳邊務一云州縣無重臣彈壓故敵所至輒陷請於定州蠡縣
廣平河閒等處各添設兵備一員一云以天下僧人配天下尼姑
編入里甲三丁抽一朝夕訓練可得精兵數十萬其餘條陳別事
多類此嗣昌具覆盛稱其可用請改迅科員有旨沈迅著改兵科
給事中

九月以邊警命丁憂總督盧象昇留督天下勤王兵入衛十月初

三日漏下二鼓傳聖諭平臺召對盧卽策馬夜詣都門平明入朝
上諭遠來入衛忠勤可嘉賜花銀蟒幣畢問方略如何象昇奏命
臣督師臣意主戰上色變有頃曰朝廷原未言撫此都是外廷議
論又曰禦□與勦寇不同卿宜慎重

先是樞部曾以舞干羽于兩階七旬有苗格喻盧宜撫上云此
與三苗不同三苗止負固不服□□乃凌犯天朝所云撫議實
出外廷洵有自矣

十七日嗣昌赴軍中會議盧面折之曰公等堅意言撫獨不聞城
下之盟春秋恥之且象昇叨承劔印長安口語如風儻唯唯從議
則袁崇煥之禍立至況麻衣引紼之身既不能移孝作忠將忠孝
胥失何以載顏面於人世乎時嗣昌並在制中不覺色戰心忤奮
言曰若如此說老先生尙方劔當從學生用起矣盧曰尙方劔當
從自己項下過如不能殲敵正未易以加人若舍戰言撫養禍辱
國非象昇所知也已復以手書折之云若獲濟封疆事卽胸中有

崇禎朝言事三
如許怪事始終不向君父一言儻閃爍售欺到底當灑血丹陛無
言不盡也

嗣昌自刻中樞集亦備載盧此書想其良心亦有所不能諱不
覺自貢其罪於是嗣昌慙沮定計置之死地矣

編修楊廷麟疏言東西從約牆傾失事楊嗣昌主款之誤至此極
也因策事之可憂者在外有三在內有五且言督臣盧象昇以養
寇責樞臣言之痛泣夫南仲在內李綱亡功潛善秉成宗澤隕恨
陛下宜及此時正言款之罪諭督臣集諸路援兵別其強弱以分
險易及今一創當必不敢再犯凡天下之功不成於智而成於愚
愚者之才不生於巧而生於學陛下毅然內斷先治內以治外使
諸臣以學自衛以愚衛國疏上命改兵部主事赴象昇行營贊畫
十一月初七日召三品以及科道官入對是日天風霾久之上傳
俟風少息進見諸臣叩頭畢上曰在內之賊深入南方關外又報
有賊作何勦禦錢糧平時壓欠今有警一月費折色三十萬本色

二十萬作何措置接濟有良策面奏來良久言調度方略紛紛不
一至言錢糧無措則有言令在京官民合助者有言令在京官與
親識商人借貸俟皇上財用有餘之日還之否則各官回家變產
還之科臣范淑泰奏戎事要在行法法不行而憂餉卽天雨粟地
湧金何益上曰朝廷何嘗不欲行法淑泰云今□臨城尙無定議
不知是要戰是要款上問主款之說何來對曰外邊有此議論又
言凡涉邊事邸報一切不鈔傳外邊皆以爲諱上曰關係機密不
許鈔傳若塘報如何不鈔傳上命閣臣卿等過來諸臣平日營私
不實心做事有實心者又憂讒畏譏不敢做所以如此若平日用
心只以朝廷之事爲事焉有不濟之理可將諸臣面奏的同商酌
奏來樞臣嗣昌奏盧象昇先言欲南去畱總監高起潛在京防守
已又言奉旨會同似難獨往仰請聖裁或畱或遣上曰象昇一人
豈能專勦嗣昌奏三協撫道守令須得人因及推舉之難又言設
處錢糧無策欲權開事例行之南方上曰親民官取償於民不可

開其餘斟酌開來

十一月初十日□兵陷高陽原任少師大學士孫承宗死之子五人孫六人與從子孫八人皆死婦女童穉同死者共三十餘人諸子皆被服儒素鏃礪文行二郎壬子舉人鈐四郎秀才鎗五郎尙寶司丞鎗尤奇偉善騎射曉兵事城陷之日鎗解裘戰死於城下鈐戰敗不屈死鈐子中書舍人之沆秀才之滂皆死三郎鈐之子秀才之灃被執誑曰引我得見宰相以金帛與汝曳至老營見其祖拜而起卽授手大罵而死鎗之子尙寶丞之詰鎗之子之灃與六郎鈐七郎鎗皆戰死城下鎗被重傷臥積屍中家僮侯果自任邱逃歸見之脅中三矢鏃不可拔口張不能言果負之歸城南莊覓水半瓢灌之氣上而絕果以十四日得主屍於圈頭以次行求諸子孫屍乞於親戚松棺柳窆斂以麤布而鎗鎗二屍終不可得事聞上惻然念慘及闔門首命優恤當國者擬其事久之部始題覆僅復官予祭葬或曰高陽令雷覺民首輔薛國觀私人也盡逐

平日守城官兵剋其餉以致城陷事敗遂匿國觀所長孫錦衣之芳詣闕籲天語侵縣令以此逢國觀之怒故卹典不獲全給

孫公在天啟時督師關門鎮守有功以忤逆奄而罷己巳之役復起原官出鎮二年邊警頓息又以其爲諸正之領袖也構而罷之至是城破徇難完節全歸亦何憾哉

首輔劉宇亮請躬行視師上命革總督盧象昇任聽勅以劉往代十二月初六日上御平臺召見宇亮奏謝言原題督察驅勦畿輔雲晉惟賊是求非敢獨當一面今奉命代總督未免是一面之任不能督察諸方上諭鑒卿忠憤定可成功故有此委任行閒有一總督賜上方行事無以復加如止督察驅勦不過是監軍豈有監軍用如此大臣楊嗣昌亦奏請行上曰一時輔臣無遣兩員之理諸輔辭國觀等同奏首臣宇亮初具揭時臣等咸言事體重大且兵將不相習還該斟酌上以成命已頒未便挽回劉出未幾終以無功罷歸時謂同事者有意逐之也

崇禎朝事三
十二月十一日總督盧象昇率兵逐□於賈莊兵敗死之時盧雖擁總督之名兵少餉缺呼應不靈既奉革任聽勘之旨以中樞爲必不相容因親率兵尾敵索戰追逐十里手砍數級三鼓還營□兵大隊圍賈莊對面不相視大帥虎大威猶能認盧力挽其馬盧以鞭擊其手不肯出圍縱兵血戰自辰至午矢盡力竭左乳忽中流矢方抽矢出鏃已復腰中一箭腦後右腮面門各中一刀遂歿於陣從殉者義勇顧顯掌牧楊凱陸二至十五日副將劉欽始獲其屍贊畫楊廷麟迎至眞定東關新年二月二十八日始克大斂距死之日已八十日矣同死者衆屍枕藉不可辨盧以首帶白網巾故識之總監高起潛匿不以聞贊畫報至上曰大臣陣亡豈不可閔恨其調度舛錯不准予卹蓋入楊嗣昌之譖也千總張國棟至兵部欲緣飾逗怯之狀上聞國棟不肯嗣昌大怒欲刑之國棟曰死則死矣忠臣而以爲逗力戰而以爲怯何可誣也始愧而釋之

廷麟之題贊畫也因其疏忤本兵兼以張沈之憾故相比爲謀實欲假手於■以殺之盧未出師之前遣廷麟至眞定與孫傳庭議事不及於難敗衄報至嗣昌首先問曰楊翰林死否報者止知贊畫不知翰林爲誰嗣昌再問曰楊贊畫死否報者答以已先奉差不在營中嗣昌爲不豫者久之嗟乎敗報之至正國事危急之時宜如何震懼失措乃止計及私仇未死者欲其死已死者欲飾以罪大臣心事如此

盧公爲吾郡宜興人少年登第夙著英略兩任畿輔府道卽以知兵聞迨爲七省總理所至躬先士卒斬獲甚多賊亦畏之相戒不敢犯盧家軍也自盧去而賊益猖獗不可禦矣使當日終以勦賊事任之必能成功倏調之於邊已不能竟其用又以中樞之齟齬厄而置之於死地竟使人才與國運同盡也悲夫十二年己卯正月北兵自臨清分部東下掠破章邱等縣直趨濟南城中新兵皆叛劫德王府開門迎敵以德王徇於城下左布政

張秉文參政鄧謙副使周之訓運使唐世熊知府苟唯善同知陳
虞肩通判熊獻知縣則厯城韓承宣臨邑宋希堯武城李永芳博
平張列宿荏平黃建極章邱高仲光等皆死之焚掠數日又出濟
南向東北所過攻城惟武定不下連破鹽山慶雲等縣復回哨破
海豐已由青山喜峰口出塞前後月破順天二縣保定九縣河
間十一縣真定十九州縣順德六縣廣平四縣濟南九縣兗州二
縣東昌七縣共七十餘城已覈東省失事諸臣罪案以撫臣顏繼
祖雖奉命守德夙事虛恢削籍聽議後竟逮問同薊撫張其平總
監鄧希韶總兵倪寵祖寬等三十三人俱棄市順撫陳祖苞先服
毒死其子編修之遴以丁憂請上追恨祖苞未正法命鋼之遴永
不敘用先是沈迅條陳有東撫不許離德州一步部覆如議繼祖
遂認定汎地僉謂敵無越德而南之理不意竟由東昌破邱縣夏
津直趨濟南濟南精兵旣盡在德州城中無備當事又無方略民
潰遂陷德州聞省城陷兵心愈擾鼓噪挾餉繼祖懼急以數千金

塞其望而兵遂以不可用繼祖疏申言原派不許離德州之地嗣
昌力排之竟及於禍

劉宇亮旣自請督師各鎮勤王兵皆屬焉時兵將皆視敵所向以
爲趨避多蹂踐居民至安平偵者報至皆相顧驚愕擬趨晉州
城以避之晉州知州陳弘緒素負韜略閉門不聽入城中士民亦
歃血爲誓不許延入兵丁劉大怒傳令箭且將以軍法從事弘緒
復語督師以勦敵爲任今口將至正建功之時奈何反欲入城卒
不聽劉遂疏劾之有旨逮問晉州士民詣闕訟冤至願以身代知
州之死者不可勝計弘緒得以輕處降四級調外用上乃頗疑督
師擾民矣

劉旣由晉州而南行閒大帥多尾敵不敢擊亦不能擊劉上疏言
之其末帶言劉光祚嗣昌與國觀謀以此去劉上稟光祚軍前正
法旨到日諸大帥俱分道前去并光祚亦不在軍前況原參疏中
罪原不至死適有武清之捷劉乃置光祚於縣獄而復請之並上

武清捷音奉旨倏參倏敘殊屬乖藐著九卿科道看議嗣昌明知聖旨往還之間必至參差必不能正法而逐劉之計行矣部覆劉宇亮冠帶閒住陳啟新言看重議輕沈迅言明旨森嚴考功之法未盡於是改議革職爲民國觀票旨仍俟事平另擬此楊薛二人主謀排擠構陷甚巧故明旨止言看議而加以議處張獻忠既降復叛初獻忠假官軍旗號暗襲南陽屯南陽援勦總兵左良玉適至北關疑之使人召之獻忠窘逸去良玉追及之兩馬相望一箭射中其肩一箭中其指於弓靶獻忠惶閒良玉舉刀劈其面血流被甲部下孫可望力前格之獻忠乃得脫逃至麻城良玉追勦之獻忠兩日夜馳七百里至穀城營于王家河戊寅正月初九破穀城出示安民云本營志在匡亂已逐闖遠遁本營釋甲歸朝爾百姓其無恐遂拘耆老具揭遣可望通賄熊文燦內有西碧玉二方長尺餘又有徑寸珠二枚文燦遂一力擔當撫之二月良玉至襄陽巡按林銘球巡道王瑞旃欲誘獻忠來見執之

文燦言殺降不祥力持不可獻忠恃文燦爲援益無忌私練士卒鑄軍器穀城諸生徐以顯一見如故教以孫吳兵法己卯春叛形昭著左良玉請討之文燦故張露其事且強畱良玉飲餞稽延時日俾獻忠得預爲備獻忠乃得從容運器甲資糧入房山部署已定文燦始出令進兵良玉曰督臺縱虎負嵎使我櫻之不去必以逗畱罪我令旗至卽冒暑進討遇伏大敗良玉乃列其事於朝樞輔楊嗣昌劾之以十一月逮文燦付法司擬罪至庚辰十月棄市次年復逮總督鄭崇儉下獄以縱兵擅回失誤軍機爲罪擬辟以五月棄市其罪實輕於文燦竟同罹大辟論者爲鄭冤之樞輔楊嗣昌疏議州縣召募鄉兵須專訓練之任或更府佐一員爲將領州佐一員爲守備縣佐一員爲把總裁訓導之一爲武職府卒一千州七百縣五百其工食或量於地畝或取於牙行或富義之捐資或居民之絕產設法通融以倣古時文武相兼之制上諭行之工部侍郎疏言其不便者數事上命責成撫按詳議究竟

徒滋騷擾未能畫一奉行也嗣昌先有疏建議考試生童必兼試
騎射議鄉試副榜准作恩貢送入國子監行積分法其數視正榜
之半先一日發榜以杜私弊俱允行後副榜貢至京送監但考一
二優等便以科道自居卒之未嘗用一人得一人也次科仍停不
行

御史王聚奎劾陳啟新緘默失職上責其妄下都察院議處僉都
李光春議以罰俸上不說竟謫調外任以吏部董羽宸不能駁正
罰俸六月上怒光春不已罷黜之然啟新之用上亦悔之只是不
肯認錯其後姜採糾之疏下部看議部議有刀筆之語上不說諭
輔臣曰處分可矣管他甚刀筆

八月命大學士楊嗣昌督師討賊賜上方劔督師輔臣銀印給帑
金四萬賞功牌千五百蟒紵緋絹各五百九月陞辭賜宴平臺復
賦詩寵其行詩曰鹽梅今日作干城上將新開細柳營一掃寇氛
從此靖還期教養遂民生所以寵之者至矣嗣昌馳至襄陽申明

軍令鼓舞將卒一時赫然而賊黨劉國能來降國能者陝西諸生
眾亂推爲帥至是降於嗣昌嗣昌造其壘信宿而返國能感動傾
心嗣昌先遣兵搜捕李自成自成跳入雒陽深山中不可得而均
州賊帥王光恩亦來降嗣昌以左良玉所部多降將謂可倚以辦
賊疏請於上拜爲平賊將軍又奏辟永州推官萬元吉爲軍前監
紀次年二月復賜內帑萬金賜斗牛服又賜海驢馬一棗驢馬一
嗣昌駐軍襄陽大調各路兵會勦時老回回革裡眼左金王南營
四股合二萬人分屯南直英霍潛太諸山寨犯安慶桐城諸路遼
將黃得功川將杜先春屢戰屢卻賊賊每避兩軍賊購黃人爲間
或攜藥囊著蔡爲醫卜或談青烏姑布星家言或爲緇流黃冠或
爲乞匄戲術分布江皖諸境覘虛實時時突出焚掠流毒四境
十三年庚辰正月考察天下官員東廠緝獲賄冊進覽命掌科阮
震亨掌道周堪賡回奏吏部尚書謝陞疏參震亨通賄敗類有據
命下鎮撫司打問震亨竟死杖下又逮劣處貪官浙江布政司姚

永濟等三十七人下刑部獄究問先是丁丑外計永濟以錢糧積欠部覆爲民浙省在京諸紳溫體仁姜逢元等五十餘人合詞保畱稱永濟居身廉慎核弊嚴明爲從來方伯之冠乃准降級管事至是又以貪處若追問前此保舉之罪不知何以解也

仙居知縣過周謀爲辭國觀門生託同鄉吏部員外熊文舉營轉禮曹令文舉之父貽書入京隱語餽國觀五百金時文舉方奉陝西典試命未還京也送書人爲東廠緝獲上聞國觀疏辨命逮文舉父下獄究問文舉具疏爲父代罪不允與周謀俱遣戍

文武品官服色祖制既定奉行已久惟是武弁概服獅子上至是重行申飭武臣三四品俱照制服虎豹至內臣從無定式蓋直擯之灑掃服役之末祖制良有深意雖太監極尊止于正四品閒有賜蟒不過舊衣之賞賚耳是時上取山海經進覽采取各種獸名定頒服式以天駟馬爲品識者謂至尊左右環列異獸蓋不祥也十三年庚辰三月十五日上御皇極殿策諸進士上乘步輦降殿

階從容周視距諸生几案咫尺上親閱試策諭禮部傳臚展期十九日傳旨召進士楊瓊芳等至會極門中使執名冊傳呼某人等四十人至文華門外序立上御殿諸進士行一拜三叩頭禮畢上諭曰爾等前日所對的策切實的固有浮縱者亦多特召爾等四十人來問報仇雪恥一事爾等學問之功旣久時勢之感又深各將胸中所見明白奏來如切實可不拘常格用諸士承旨起過東偏立中使奉一黃綾函傳御題十幅卽面諭每四人共閱閱畢以次跪報姓名對上注聽甚殷執御筆書錄數語或有名註圈點者分十班對畢行禮出二十日傳臚賜魏藻德葛世振高爾儼及第又傳聖諭昨召諸士奏對明爽者趙玉森姚宗衡劉瑄孫一脈嚴似祖著授翰林黃雲師周正儒宣國柱周鼐李如璧授科員馮垣登陳純德陳羽白魏景琦吳邦臣授御史稍明者董國祥顏渾張朝經葛奇祚錢志騶張經呂陽盧若騰蔡肱明田有年授吏兵二部司務卽行察缺填補初閣中照例進十二卷上命取餘卷再三

皆以十二卷進其至四十餘卷皆一一召對親拔數人藻德北通
州人自言三次守城功上心識之遂拔第一壬午冬復以面對稱
旨超拜詹事入閣旋正首揆甲申之變不能盡節爲賊夾辱而死
負恩甚矣上以考選不列舉貢傳諭吏部將廷試就教舉人貢生
二百六十三人吳康侯等悉照進士選授部寺司屬推知等語此
係特用後不爲例於是與選者遂豎黃旗竿稱御進士此一奇也
然卒無一人可用可副破格特恩者

江西巡撫解學龍疏薦布政司都事黃道周有學問直貫天人品
行無忝周孔等語上以道周黨邪亂政學龍徇私藐法俱著緹騎
逮問工部主事葉廷秀疏救之上怒甚命廷杖廷秀一百道周學
龍各八十俱仍下刑部擬罪國子生涂仲吉復上疏言道周清忠
苦節昔唐太宗恨魏徵之面折至於欲殺而終不果漢武帝惡汲
黯之直諫雖遠黜而實優容皇上欲遠法堯舜奈何出漢唐主下
通政司格之不上仲吉併劾通政使施邦曜遏抑言路上怒逮仲

吉廷杖一百邦曜革職下道周等鎮撫司揭問逼供同黨鍛鍊甚
酷乃指數員塞責因及通政馬思理編修黃文煥吏部主事陳天
工工部司務董養河中書文震亨俱下獄有崑山諸生朱永明持
百錢賂仲吉亦在招中刑部司官吳文燦遲案不上廷杖六十革
爲民諸人杖皆不死得錦衣郭承昊調護力也刑部尙書李覺斯
亦革職爲民一番具招一番嚴駁淹滯獄中一年餘至宜興再召
片語回天始得解網後事詳卷是時武陵亦已自盡矣

大學士辭國觀冠帶閒住給事中袁愷再疏劾其納賄有據并及
吏部尙書傅永淳刑部侍郎蔡奕琛等並免官又逮左副都御史
葉有聲下刑部究問時株連頗眾旋遣緹騎逮問國觀到京師賜
自盡籍沒家產入官國觀初與嗣昌比謀去劉宇亮遂正首揆益
無忌憚任用私人王陞彥通賄賂於外怒老中書周國興楊餘洪
不爲用捏洩旨事參之皆斃於廷杖兩人家遂密緝其納賄事
件投於東廠令具事件密聞於上上心動久矣適史堃死所輦多

金為布置地者皆入於國觀周楊二家嗾莖之家人出首事已上
 聞錦衣衛提其長班鞫問供吐甚詳國觀疏辨云楊士聰之參史
 莖別有緣故又稱莖曾參黨人袁崇煥等為黨人報復云云而已
 奉旨議處私人王陞彥下獄部覆國觀閒住出都之日賊私纍纍
 用車數百輛兩家復聳邏卒具事件密奏聖心益怒特旨王陞彥
 即著會官處斬而國觀復逮凡招上或斬或絞卷中已詳奉旨止
 云即著會官處決今陞彥招未成裁自聖斷故云斬決此旨從來
 所未有也後吳昌時之斬奉旨亦與此同人謂陞彥之罪實由昌時設謀構成故天報不爽國觀逮至候
 命外寓而即令自盡之旨下時已高臥家人報錦衣齎詔至蹙然
 曰我死矣倉卒覓小帽戴之宣詔畢頓首不能出聲自盡後緹帥
 驗視回奏次日始奉旨准收斂蓋懸梁者凡兩晝夜云

十四年辛巳正月十一日流賊李自成陷洛陽福王自殺先是河
 南撫鎮分汛禦寇總鎮王紹禹主守雒城賊在宜陽永寧殺王戮
 官紹禹即揭報撫臣且盟在城各官分門監守羅劉二將營於城

外十九日賊至羅劉戰敗賊遂抵城下二十日力攻一日至更餘
 有叫喊於城上者兵士盡譁先執王守道索糧王府中人開北門
 放賊入守道王胤昌知府馮一俊鄉官尚書呂維祺寺副邢紹德
 俱不屈死賊入王宮執福王將擁戴之云神宗皇帝原有意傳天
 位於大王王叱之曰吾從不聞此語何故背義造誣賊又請王諭
 筆王不可賊遂以繩進請王自裁王又叱曰任汝殺我賊遂共縊
 殺之有小內官崔升勸王寧死勿屈抱王至死不去并見殺兩承
 奉告賊以棺斂王尸亦即自殺賊盡焚王宮畱十餘日煮粥以餉
 飢民又考賞秀才於二月初二日棄城閉營一路上魯山一路上
 汝州劫掠滿載去去後授書辦邵時昌為總理統守雒城閱一月
 後巡撫李仙風至孟縣誘執賊將以兵臨雒城時昌開門迎入仙
 風遂以恢復奏聞言福王受驚疾死旨責其欺飾逮下獄論斬
 二十四日上御乾清宮召閣部科道諸臣入諭曰朕御極十四年
 國家多事復遇饑荒流寇猖獗近且攻陷雒陽福王被害夫親親

仁民仁民愛物親叔不保皆朕不德所致真當愧死聲淚俱下閣臣奏此係氣數所致上曰說不得氣數就是氣數亦須人事補救年來何曾補救得幾分召兵科張縉彥命將河南事奏來縉彥奏福王遇害是真遇害時有內員環泣不忍去上問何名縉彥奏是崔升又問世子有何人跟隨縉彥奏聞有王府校尉數十人上長歎淚下又奏福王身死社稷葬祭慰問都宜從厚上曰說得是因召禮科諸臣曰朕欲差一員前去各奏來李焯奏督師出兵一年有餘惟初次有瑪瑙山一小捷今遂寂然須另遣大將幫他上曰督師去河南數千里如何照管得到你們亦當設身處地李焯奏因其照管不來故請再遣上又曰已遣朱大典便是大將章正宸奏闖賊從四川來樞臣陳新甲旁立急應曰自秦來不自川來言至再蓋從川來則其責在嗣昌也上召新甲諭曰卿部職司調度須為朕執法如姑息誤事皆卿部之罪縉彥奏雜封失陷凡王府宮眷內外官紳士民焚劫甚慘急須振濟上曰朕即措發諸臣叩

頭退即傳諭駙馬都尉冉興讓太監王裕民禮科葉高標前去河南慰問世子詳察福王宮眷存亡及殉難官人等除前發振濟銀三萬兩外御前發銀一萬兩坤寧宮四千兩承乾宮三千兩翊坤宮二千兩太子一千兩慈慶宮一千兩慈寧宮皇祖昭妃五百兩皇考定妃五百兩齋去支用

二月初一日張獻忠陷襄陽殺襄王屠王府官民人等數萬人先是嗣昌在本兵時議兵十餘萬於各邊特加練餉更浮於遼餉之數至是即撥練餉為勦寇之用餉足而民怨已極嗣昌進勦張獻忠獻忠出戰墮馬幾被擒復逃去逃入瑪瑙山中嗣昌令降將劉國能圍之獻忠食盡分兵四出鈔掠不得糧者歸即殺之其未歸者懼殺詣軍門降國能將之前行偽稱糧至獻忠開營延入國能乘其不意縱火大戰掃其營壘擒其妻孥及賊黨徐以獻潘應龍等送襄陽獄獻忠批藤墜巖澗逃去率眾直走四川隨又困之竹溪房縣大兵四面固圍無毫髮閒隙可容片甲遁去而蜀撫邵捷

春與嗣昌不相合又聽讒言殺戰將楊茂選軍士皆怒於是夔關失守賊復逸出署部稍定復返湖廣假稱楊閣部兵至坐乘八轎併民扛火藥文書印信皆同道府不疑延之入城城上火起賊盡入合城鼎沸獄中者俱出與之合先攻襄王府執襄王坐之堂下獻忠勸以卮酒曰吾欲斷楊嗣昌之頭而嗣昌遠在蜀今當借王頭使嗣昌以陷藩伏法王其努力盡此一杯酒因縛王殺之遂焚其屍又殺貴陽王常法等四十三人承奉閩國鼎等八人知府王承曾保福清王常澄得脫督輔楊嗣昌在荊州聞變懼禍遂自縊死時三月朔日也監軍楊卓然以病故聞上諭部院嗣昌雖二載辛苦一朝盡瘁有瑪瑙山等諸捷不能掩闖獻鴟張兩藩罹禍名城屢陷殺掠頻聞雖病故還著九卿科道會勘議罪

先是熊文燦檄僉事張大經監獻忠軍大經初至爲陳說禍福獻忠頗爲致敬及文燦措置乖方獻忠遂拘大經爲質大經悔爲文燦所賣鬱鬱死於房縣初獻忠駐扎穀城時知縣阮之鈿多方調

護士民賴之獻忠叛之鈿瀝血書絕命詞於襟仰藥死其破襄陽也知縣李天覺北面叩首置印于案自縊死推官鄺曰廣被執不屈死嗣昌之初出督師其輜重裝入大鏡中寄於固始縣庫死後知縣時敏盡取之以歸不下數百萬敏以此營兵科甲申降賊後爲鄉里搶掠其半乙酉之變盡行燒毀併殺其身焉今其子且不免負薪矣嗟嗟此皆民膏民脂也天意豈容若輩享哉

蜀撫邵捷春爲楊嗣昌疏參奉旨差官旗逮問捷春夔關之失不爲無罪然在地方實得民心軍民因鬪然逐散官差蜀王爲之疏請奉旨朝廷大法豈容百姓阻撓邵捷春著巡按官差護送來京下刑部究問坐以失誤軍機決不待時斬旨未下而先一日報卒上疑有洩漏情弊并處該司官

自邵捷春得罪後繼之者爲陳士奇但清謹而無禦亂才故蜀事益不可爲矣陳紳初舉臬司馬乾者得民心有邊才宜推爲撫當事知其爲乙榜也故抑之而別推噫此何時也何地也而

崇禎朝事三
猶拘資格耶

諭吏部凡遇侍郎巡撫員缺須將資深翰林同推各部侍郎仍許兼侍讀學士惟巡撫不許於是推詹事李紹賢爲戶部右侍郎督理錢法未幾又推原任祭酒倪元璐爲兵部右侍郎刑部胡周鼎疏言外戚張國紀所記懿安皇后事當日岌岌可危今皇七子降生宜加聖后徽號上以其無端突發疑窺伺宮闈令回奏旋革職下獄內閣范復粹奉旨清獄囚奏各犯官共六十六名內而尙書侍郎都察院科道部屬外而督撫司道府縣等官無不畢具如原任尙書侯恂傅宗龍府丞戴澳巡撫黎玉田常道立方孔炤給事中宣國柱耿始然御史成勇魏景琦兩司范良彥賀彌司屬倪嘉慶孫嘉績熊汝學朱國壽朱日燦諸犯各殊幽沈則一當下部作速清理又特舉原任江西布政朱之臣總兵劉光祚之才乞復官起用奉旨朱之臣准還職劉光祚准軍前效用

應天巡撫黃希憲奏報擒獲江海大慙黃尙忠得空船四十餘隻爲總兵王之仁守備湯夢復之功蓋尙忠不過海上販鹽之徒非寇盜比也撫臣聽信將領妄報邀功從此海上日多事矣

上諭吏部以時事多艱佐理須人舊輔周延儒張至發賀逢聖俱忠猷未竟各起原官入閣辦事著該撫按官敦請就道三臣各具疏辭不允閣中自戊寅年特用楊嗣昌等五人後己卯年又用費縣張四知滑縣魏照乘蘄水姚明恭三人庚辰年又用德州謝陞并研陳演二人自金溪病故韓城得罪武陵督師出其餘相繼去位是時閣中止范張魏謝四人而范亦旋予告矣一時諸輔皆無有當聖意者衆推宜興才智可以仰輔且林居以來又能化洛蜀之異同皈依衆正優容敗類於是庶吉士張溥禮部主事吳昌時輩爲之營謀涿州舊輔與商邱桐城輩亦極力資助通於內璫竟得召用雖及張賀二人而意則專屬在周故賀到不久卽去張以病不至

時朝政嚴切歲事凶荒兵餉掣肘臺省是非訐直互尙政府自烏程之後繼以淄川韓城皆祖述故智媚嫉賢才盈廷重足久無樂生懷矣宜興憂之思維濟之以寬首引用先朝故老如劉山陰鄭建德輩召還言事遷謫科道復絳誤舉人廣取士額釋漕白欠解戶併蠲民間積逋赦宥戍罪以下盡還家再陳兵殘歲歉地減見年兩稅蘇松常嘉湖各府許以次年夏麥抵漕兌將佐功罪賞罰不踰時至卹死褒忠等事向期期不予者皆朝報夕下天下仰望丰采如久污得沐宿鬱臨春之快又特請撤回監視璫差停止廠衛緝事尤爲不易得之數使天欲平治則循此不變豈非救時宰相卽繼美國初三楊無愧矣乃美不克終竟使身名與國運同盡也悲夫

諭吏部吏科曰朕維足國要在阜民強兵要在擇將今國用日煩民生日困朕心如傷每廷議足用則必取之於民言卹民則又慮訕於賦國與民無並足之方矣建牙設鎮不知凡幾推轂徒勤登壇罔效豈以天下之大竟無明習心計謀裕折衝者乎朕拊髀側席未獲一遇意者敷求之道未盡也今特開裕國足民科奇計異勇科使海內人士望的而趨有以自見至訪求驗考徵辟選舉更須良法務期豪傑傾心弓旌生色以稱朕破格旁求至意該部科議規則來行

四月差勳臣朱純臣戚臣劉文炳禮臣林欲楫攜帶識地理的往南京會同守備太監南京禮部官恭詣孝陵循行察勘附陵三十里地方及龍脈經行之所俱不許燒灰作窰并泗州祖陵鳳陽皇陵一併蹋勘時有奸民誑奏地方居人侵傷陵脈者故有此遣上先期御中極殿召閣部文武諸大臣面諭再三各賜坐宴於殿上又賜欽遣三臣路費綵段

蔣德璟曰中極舊名華蓋嘉靖中易今名前卽皇極後爲建極雖相連而中極特爲高閣上寶座周圍刻金龍形諸臣就席時上以齋不用酒止用茶計十三人人各一席席各三十餘器皆

御膳所蔬菓甚精潔非光祿寺蔬也上坐覽文書司禮大璫旁立時跪承旨而諸臣左右坐宣德後久無此禮矣祖制宴羣臣多在午門文華門外惟郊祀慶成宴三品及學士在皇極殿內永樂中召坐西內圓殿宣德中召宴萬歲山廣寒殿嘉靖中賜宴西苑不聞侍坐蓋正統中坐禮久廢矣今上十三年始議行之而中極自國初賜宴親王外未有也

上既遣三臣往南成國時總督京營戀戎政印因疏請帶印往南又請帶京營兵千人護行託言便道護糧艘北來相機勦寇上已許之部科俱疏言其非十八日上復召諸臣入諭三臣曰勘陵重典三公正卿帶千兵不爲多但須嚴禁騷擾成國因言諸臣阻撓上曰他們說的亦是地方供應難且既有關防京營印不須帶去若言勦寇不將勘陵事誤了糧船北來此兵南去亦難兼顧京營印外面亦行不得只交協理侍郎收了

蔣德璟曰時部科疏並入成國甚以阻撓爲恨若各將疏意發

揮將成聚訟上一出不言有疏但戒諭再三嚴禁騷擾並解其京營印諸臣見其言之行不須再開口彼此無事形迹不露居然杯酒釋兵權作用也

北兵圍祖大壽於錦州填濠毀塹聲援俱絕有四卒閒出云城粟足支半年苦乏薪耳傳大壽語宜以車營逼之毋輕戰總督洪承疇集兵待援未決奏聞上憂之召問中樞陳新甲計將安出新甲求退與閣臣侍郎諸臣酌議請遣司官面商於承疇時有七可憂十可議之奏祈皇上察報因遣郎中張若麒往行營酌視若麒謂宜亟戰立趣承疇進師承疇不得已合兵十萬率總兵曹變蛟吳三桂王樸馬科楊國柱至乳峰近錦州五六里方夜連車營環以木城部署旦始定□以萬騎來攻獨國柱遲至結營未及掘濠敵騎乘之國柱戰沒亡失萬騎餘營未動又相持數日官軍大潰初錦州被圍急救至方戰未決□掘松山斷我歸路遂大敗蹂躪殺溺不可勝計若麒走海上從漁舟潛渡至寧遠承疇等退守松山

未幾報全軍覆沒關門勁旅於是盡喪矣事聞上驚悼甚設壇都城親臨賜祭所以議褒卹死事者極其隆重云究所以致敗者則是若麒之催戰爲之旋逮若麒下獄擬罪

五月赦兵部尙書傅宗龍於獄以右侍郎兼都御史督兵勦賊九月宗龍率兵至新蔡與保督楊文岳之兵會賀人龍李國奇將秦兵虎大威將保定兵其結浮橋渡河合兵趨項城初五日兩軍畢渡走龍口自成汝才亦結浮橋於上流將趨汝寧覘官軍至盡伏精銳於松林中陽驅諸賊從浮橋西渡人龍候騎覘賊飛報曰賊渡河向汝矣次日宗龍文岳兩軍次孟家莊遇賊伏敗績人龍大威北奔國奇從之文岳奔項城宗龍獨立營當賊飛檄國奇人龍救二帥不應宗龍穿濠築塹以拒賊亦穿濠以困之宗龍兵食盡殺馬騾以享軍至十四日簡卒尙有六千夜漏二下潛勒軍突賊營潰圍出諸軍星散宗龍率散卒且戰且走次日至項城賊追及被執至門下呼於門曰我秦督官軍也請啟門納秦督宗龍大呼

曰我秦督也不幸墮賊手左右皆賊毋爲所給賊唾宗龍宗龍大罵曰我大臣也死則死耳豈能爲賊詐城以緩死賊以刀擊之遂遇害事聞贈太子少保予世廕賊遂陷項城分兵屠商水扶溝所在土寇蜂起中原山陝無寧宇矣

按傅公初巡按貴州定安酋之亂卽以知兵名崇禎初年以樞輔孫公薦晉撫順天督薊遼尋以邊警逮下獄論罪復起家巡撫四川擒治川寇有功卽晉任中樞在楊嗣昌入閣之後嗣昌奉命督師討賊數上章請兵食不能悉應抗章言中樞不稱任傅公亦疏劾嗣昌徒以氣凌廷臣耗國家兵食不能報效時上任信嗣昌爲奪傅公官下之獄嗣昌敗復起三邊總督任勦寇事一時竟推其揮霍之才可以爲國家獨任重擔然宗其宦跡按黔一年撫畿一年督薊二年再起撫蜀一年爲大司馬一年爲三邊半年未見其有殺敵定變成效奇功也蓋有才而不用與用之而不能竟猶勿用也今傅公非不用亦用之不竟也其

按黔治兵有序何不卽以爲撫其撫畿督薊雖無顯功亦無僨事何以罷官論罪撫蜀未幾何以卽入中樞中樞之席未煖罪未著何以復革職下獄迨倉卒起之囹圄卽授以督師與諸邊兵將俱未素習而驅之使戰遂未免一挫而死嗟乎但成一死節之名其於天下事竟何益哉

賊旣大敗秦督兵乘勢直破歸德督師丁啟睿自商城北發檄左良玉期共擊賊楊文岳亦招集散亡於陳州兵將稍集自成汝才合兵陷葉縣殺守將劉國能初國能與自成汝才同爲賊後降於左良玉汝才深恨之至是聞國能在葉誓必殺之國能力戰不屈城破被殺事聞詔贈國能左都督

十一月陝西巡撫汪喬年率總兵鄭家棟牛成龍賀人龍將兵三萬趨河南先是喬年在陝西發李自成先冢得小蛇卽斬以徇誓師進兵以輕騎萬餘抵邠縣時襄城先破喬年遲疑不敢進襄城貢士張永祺率邑人出迎官軍屯於城下自成聞之解郟城圍來

迎戰喬年安營未定有二將先逃官軍潰賊乘之一軍盡覆喬年收步卒千餘入城固守五日城復陷喬年被執見殺自成深恨諸生遂剽刖百九十人又購永祺永祺匿免屠其族九家殺守將李萬慶萬慶乃降將射塌天也累功至副將至是死之詔贈官立祠襄城自成再破秦師獲馬二萬降秦兵數十萬威鎮河洛乘勝圍南陽城陷總兵猛如虎死之時楊文岳屯杞縣丁啟睿屯汝寧太監劉元斌率京軍救河南聞南陽陷乃擁婦女北去俄上命御史清軍元斌倉皇悉沈之於河元斌以縱兵殺掠冒功論辟未得旨卽奏辨上怒之立誅並誅太監王裕民

重修太學成先命太監王德化率羣臣習儀八月十八日聖駕臨雍升彝倫堂祭酒南居仁坐講臯陶謨天敘天秩至有土章司業羅大任講易咸卦天地感而萬物化生一節命文武官三品以上俱坐聽賜茶畢行禮退上入彝倫堂後敬一亭觀世宗所立程子四箴諸碑遂傳禮部將學廟內各碑俱摩搨進覽又有古碑殘缺

亦令察補進呈於是駕自成賢街至安定門登城上坐明轎至東北角樓親閱樓工召閣臣樞臣工臣責工部糜費久之復諭閣臣謂宋儒周程張朱邵六子不宜列於先儒之內宜有特稱下禮部議後禮部會同詹翰各官議周程張朱邵六子俱進稱先賢云十二月黃道周解學龍涂仲吉各擬煙瘴地永成葉廷秀馬思理各戍邊黃文煥董養河陳天定文震亨分別配杖初刑部尙書劉澤深擬道周永成上不允因上言曰道周之罪前疏已嚴矣過此惟有論死自來論死諸臣非封疆則貪酷未有以建言蒙戮者且皇上所疑者黨耳黨者見諸實事道周空言無據如者始未嘗不相與今日斥之烏有絲毫黨氣而煩聖明之震怒動朝廷之大法耶當此生死之關不敢不存一難慎之心敢仍以原擬上疏入允之

黃景昉撰黃公行狀略云江撫解公升任薦僚屬疏例下第不足勞萬幾聞有簽貼其旁致上怒者遂得扭逮之命比入獄廷杖擬罪屢嚴聲色洵洵莫必其命余爲拉同鄉蔣公德璟王公家彥謁謝德州請之謝太息曰死矣遲遲爲幸聞之失色總承韓城毒燄之後餘威尙震武陵雖出督師柄得遙參宣督入爲中樞同憾公前疏刺痛同年費縣并研年誼漠如滑縣且下石矣宜與周公新召至衆喁喁望丰采諸名流力憇憑之婉代開釋得免死改戍周公又於講筵平章他疏馴語及公余與蔣公同贊其說初冀得免戍幸矣竟復原官實出望表本聖主乾斷度越百王天下亦以是亮周公焉

崇禎朝記事卷三

崇禎朝記事卷四

十五年正月元旦上御殿朝賀畢下寶座南面立顧內侍命召閣臣來閣臣由殿東門入再奉旨趨至殿簷行叩頭禮畢跪以聽命上曰閣臣西班牙來蓋以師席待諸輔也閣臣起立不知上意擬取東西兩班上又曰閣臣西邊班來隨有一閣下引而前上宣閣臣來諸輔趨進上曰古來聖帝明王皆崇師道今日講猶稱先生尙存遺意卿等卽朕師也敬於元旦端冕而求聖躬卽轉西面向閣臣一揖因言經言尊賢也敬大臣也朕之此禮原不爲過今而後道德惟諸先生訓誨之政務惟諸先生匡贊之調和燮理奠安宗社民生惟諸先生是賴又曰自古君臣志同道合而天下治平朕於諸先生有厚望焉諸輔臣跪謝不敢當上曰先生正是當敬的言之再三隨諭先生起諸輔臣始起轉下叩頭上還宮後復補賜聖諭時輔臣爲周延儒賀逢聖張四知謝陞魏照乘陳演六人云諭各省直十二年以前一應存畱起解上供本折錢糧盡行蠲免

又以江南荒旱許各府州縣以麥抵漕百姓歡呼稱慶又從刑部侍郎惠世揚請豁免十二年以前贓罰銀兩又發帑金二萬振山東荒先是十三四年蘇松常鎮四府皆大旱蝗蟲食苗民皆告饑浙西三府又大水爲災一望漂溺漕儲缺額徵比無方而湖州一府尤甚十四年七月浙撫參德清崇德兩縣尤遲兌誤漕時政府方尙嚴切遂奉旨差緹騎拏解兩縣印官崇德令趙夔自縊死德清令朱實蓮逮至京下獄擬罪時漕事亦已報竣實蓮因具疏陳地方荒苦狀始得釋罪調用則屬宜興爲政矣

朱君字子潔廣東南海人天啟辛酉方弱冠受知於先忠毅拔魁一經工詩文重氣誼屢躋春闈以薦舉授是官到任未一年也被逮後所著詩有冬春草吳巒穉先生序之曰詩以言乎心之所之也心乎親者其言之乎孝心乎君者其言之乎忠心乎民者其言之乎仁吾友子潔氏令臨溪著循廉聲忽詔獄尋詔釋之還其官所撰冬春草言孝言忠言仁令讀者流連嗟歎而

不容已因以知其心焉先是其師李仲達侍御亦吾友也以觸璫詔獄所撰有受命草亦言孝言忠言仁足令人嗟歎而不容已然侍御之冤當其身不白也今子潔幸遇聖明復得出以展其大用凡所言忠言孝言仁慮無不可發而措諸事業者其重勉乎哉侍御可謂有生友者矣

御史張肯堂疏請還向來言事遷謫諸臣略曰在諸臣率意敷陳罪止成於狂戇在聖明薄從降罰法姑予以困衡嘗讀其封事或議征求宜緩或陳刑獄宜寬或糾行閒功罪之淆或爭朝端名節之重或糾彈巨奸於氣燄方張之日或牴牾近習於威權思竊之時一腔忠愛天日共鑒偶經挫折便作逐臣雖盛世原無棄人何官不可自效然使之回翔中外何如特加環召錫復原職之大快人心乎奉旨下部察覈於是原降用李清等凡人俱准復給事御史云

張公在言路頗著蹇諤聲後官閩撫遇變不屈蹈海從王全節

而死事另有記

三月召對考選諸臣於中左門問解圍急著中原禦賊何策兵至之處作何轉輸災荒之民作何生聚足食足兵何以使民生不困議蠲議緩何以使國用仍充其各悉心條奏時行取各官待命闕下皆仰祈宜興援引適漕運愆期宜興因請速下諸科道命使之分頭催餉於是考選四十四人朱徽馬嘉植等咸授科道無改部曹者內惟劉熙祚以巡按河南爲賊所執不屈死難嗟塚在諫垣直言著節幾斃詔獄此外無一人足副特恩者矣

禮科倪仁禎疏言臣等初授科例於朝房候見閣臣謝陞言及兵餉時事忽曰皇上惟自用聰明以察爲明致天下俱壞陞居位輔弼敢歸罪天子如此吏科朱徽廖國遴亦劾奏同之上怒下廷臣議處命削籍爲民陞先任冢宰與唐世濟合謀薦逆案霍維華世濟下獄陞閒任自唯嘉罷後以南京右都御史莊欽鄰爲冢宰久不到任奉旨詰責調用復召陞爲之庚辰冬同陳演入閣聖眷頗

隆次年辛巳上命追寫孝純皇后同孝元皇后光宗皇帝御容一同迎入上親致祭諸閣臣陪祭陞獨後至臺省參之陞疏辨謂臣將出門而衣帶忽斷再續再斷以是後期乞提裁衣者同班役下法司訊鞫雖奉旨免究而上意已動至是遂罷斥夫以大臣而委罪下役其作事之乖亦見一斑矣

御史徐殿臣劉之勃各疏糾輔臣魏照乘得旨准其請告魏初與韓城善每票擬輒效其深文駁摘宜興入後諸輔請教唯謹魏崑行自如宜興心不然至是糾疏入方一疏引疾卽票旨允歸未幾費縣江夏亦相繼予告去

起升馬士英兵部右侍郎兼都察院僉都御史總督廬鳳等處軍務馬前任宣府巡撫爲總監王坤參其支用庫銀事逮問遣戍馬本貴州人久僑居金陵與東南諸紳往來頗善至是以流賊橫行江北會推鳳督列名其中上頗怒謂會推大典輒用廢棄冢臣蒙蔽殊甚宜興奏曰冢臣豈敢欺實以士英曾歷邊疆有才可惜今

止開列候皇上裁用惟是不先奏明爲有罪耳上怒始霽曰馬士英既有邊才卽著他去以起官馴至有南渡之柄用矣上以寇氛未靖民罹鋒刃建齋南城每子刻同中官往誦佛經移時然後還內禮科姜採疏言宗社之安危非佛氏之能禍福也以九重之尊對西竺之繁文臣不敢以爲可且正德年之往事皇上豈不見及此耶御史廖惟義疏請驅真人羽士各還原籍侍郎王錫袞請遣真人張應京歸皆不報先是召應京入都卽傳禮部宴待部奏會典宴法王在大慈恩寺則宴真人宜在宮觀上遲回久之始報可旋召應京至會極門賜賚甚渥比洪熙時所賜逾數十倍諸司無敢執奏已加王錫袞服俸一級嘉其諫上事佛寓規於愛也

宮中舊規上每年冬底書符召仙或召將叩以來歲事無不應者至是召之不至良久玄帝下臨批云天將皆已降生人間無可應召者上再拜叩問天將降生意欲何爲尙有未降生否此答云

惟漢壽亭侯受明厚恩不肯降生餘無在者言畢寂然再叩不應矣

六月十九日上召會推諸臣吏尙李日宣禮尙林欲楫左都王道直禮侍王錫袞蔣德璟左副都房可壯正詹李紹賢兵侍吳牲刑侍惠世揚徐石麒工侍宋玫詹事黃景昉邱瑜通政使沈惟炳大理卿張三謨諭德楊觀光共十六人來中左門徐以病不至同輔臣賜飯畢先召諸輔臣入德政殿賜坐次輔賀逢聖時以奉旨允放猶被召入見忽放聲大哭不止久之召兵部詢邊事又召日宣道直入頤之諭曰卿二人不須召對俱令出上移駕至中極殿輔臣亦入殿賜坐賀復放聲大哭拜跪數十不止命之出殿行五拜三叩頭禮辭朝復大哭不止見者怪之旣出方召預推諸臣入行禮畢令入殿內依班魚貫立御牀東上曰□□未滅流寇猖獗天變民窮卿等有何嘉猷奏來卽令各依會推次序進奏奏對畢殿內先備酒六卓將賜諸臣坐宴而房宋張三人奏對不稱旨上遽

傳令各回衙門遂俱出是夜傳旨命德璟景昉牲三人入閣而以濫推多人責吏部回話

賀公居身清正不諧於時故再召未久旋即告歸家居武昌十六年獻賊破城全家殉難大節凜然此時陛辭痛哭豈非憂國憂君明知禍敗之將至有不能言不忍言者耶同輩泄泄者流或反以怪異目之矣噫

二十一日上召府部九卿科道入弘政門賜飯上御中左門皇太子定王永王左右侍立各官行一拜三叩頭禮朝東宮亦一拜三叩頭朝二王一拜一叩頭上服黃袍東宮二王俱服紅袍上喚吏部尚書李日宣其聲頗厲次喚吏科都章正宸河南道張瑄副都御史房可壯工部侍郎宋玫大理卿張三謨各下跪上曰枚卜大典如何濫推許多如房可壯等三人果堪推舉麼責令回話尙是支吾日宣奏從不敢徇私上曰前爾奏當秉公執法惟知有君父不知有私交知有國法不知有情面你那一件不是情面朕數次

優容全然不悛正宸奏日宣素是游移臣前有公疏糾他此番實不敢徇私日宣奏可壯素有丰采宋玫年少向學三謨亦曾掌河南道過上怒曰住了錦衣衛通著拏了王錫衮著改吏部侍郎署印日宣等六人俱去冠拏出天怒方震諸臣相顧失色景昉牲跪辭新命因奏臣等亦在會推中諸臣既有罪臣等豈能自安上曰已有旨了輔臣奏枚卜大典尙望聖慈寬宥左都王道直奏頃會推俱是冢臣與科道商推臣不敢置一語上諭此後會推只用翰林其餘衙門間陪一二人不許多推旋令各賜茶品訖明日有旨下六人刑部問日宣等三人遣戍可壯等三人削籍又以議罪不當罷刑部侍郎惠世揚或謂初次不與推者流言入內及再推又有不與者陰行中傷復有二十四氣之目徑達御前皆有小人傾陷故上怒如此

增鄉試解額北直生員十名監生七名南直生員十名監生五名浙江江西福建湖廣各十名山東山西河南陝西四川各八名廣

東西六名雲貴各二名獨河南以寇亂停試至次年春始補何瑞徵朱統飾主考南北公行賄賣以關節中者居其大半時有對云不用孔子不用孟子只取公子不要古文不要今文只取真紋吳郡有捲堂文又有四書成語編文悉快人口

起孫傳庭爲兵部侍郎兼都察院僉都御史總督陝西軍務勦寇傳庭至西安檄召諸將聽令各以兵來會既集乃縛賀人龍責之曰爾奉命入川討寇開縣譟歸猛帥以孤軍失利獻賊出柙職爾之由爾爲大帥遇寇先潰致秦督秦撫委命賊手一死不足塞責也遂正法軍前諸將莫不動色因以人龍兵分隸諸將刻期進討人龍米脂人初以諸生效用佐督撫討賊有功總全陝兵降賊多歸之人龍推誠以待往往得其死力襄城之役朝廷疑人龍與賊通密敕傳庭殺之賊聞人龍死酌酒相慶曰賀瘋子死取關中如拾芥矣

命侯恂以兵部侍郎總督援勦兵討賊與孫傳庭協力援開封七

月賊圍開封久先召總兵許定國以山西兵援之兵潰于覃懷時督師丁啟睿保督楊文岳合左良玉虎大威楊國政方國安諸軍次于朱仙鎮與賊壘相望啟睿督諸軍進勦良玉曰賊鋒方銳未可擊也啟睿曰汴圍已急豈能持久必擊之諸將請詰朝戰良玉以兵南走襄陽諸軍相次而退營亂啟睿文岳聯騎奔汝寧賊渡河逐之追奔四百里喪兵馬數萬啟睿印劔俱失事聞逮啟睿下獄文岳革職聽勘後閏十一月賊犯汝寧文岳以兵救之不克賊執文岳及分巡僉事王世琮殺之世琮屢卻賊有功賊射矢貫耳不動號王鐵耳

賊久圍開封城中食盡人相食周王先後捐庫金百二十萬復捐歲祿萬石以養兵國廩空虛宮人咸有飢色城北十里枕黃河巡撫高名衡推官黃澍等守且不支特引河水環濠以自固更決隄灌賊可潰也九月河決賊先營高處然移營不及亦沈其卒萬人河流直衝汴城勢如山岳自北門入穿東南門出流入渦水水驟

長二丈士民溺死數十萬巡撫各官咸乘小舟至城頭周王府第已沒從後山逸出西城樓率諸王及宮眷露棲城上雨中七日督師侯恂以舟迎王及巡撫推官黃澍從王乘城夜渡達隄口諸軍列營朱家寨賊乘高據筏以矢石擊汴城北渡者城中遺民尙存數萬賊浮舟入城盡虜以去河北諸軍以大礮擊之奪回子女五千餘人舊河故道清淺不容尺歸德隔斷在河北邳毫以下皆被其災汴城佳麗甲天下羣寇心豔已久前後三攻之士民死者無算賊積恨矢必拔久懷灌城之謀願以子女珍寶山積不忍棄之水族至是河大決百姓生齒盡屬波臣斷垣礮水上數堞隱見而已黃澍以守禦功召對特授御史卽發十萬金令澍齋往以三萬賜周王餘分振宗室及被難飢民

禮部疏題諡典五年一舉今自特賜外無不久停卽如詔獄一案諸臣慘死者衆而得諡者止楊漣魏大中高攀龍周順昌周起元繆昌期六人無容議外其未得諡者則尙有左光斗李應昇周宗

建等九人今恭繹明綸仰見當時慘死多人若左光斗等正在皇上垂憐洞鑒中謹將諸臣本末開列上請一體加恩易名云云奉聖旨易名大典宜核公評所列慘死各官卽著該部會同詹翰儒臣察明觸奸本末章疏實據及本官生平品行是否允愜逐一核議具奏

按諡典必由部疏請旨俞允然後詹翰諸臣擬議送閣閣中具揭題奏崇禎初蒲州爲政因姚文毅之議先題趙忠毅公等十人同難中惟楊忠烈高忠憲魏忠節周忠介與焉續經鄒惟璉張國維凌義渠姚思孝諸公催請雖有旨下部終束高閣至十一年給諫熊維典特疏舉先公亦奉旨下部部不爲題覆也宜興再召頗留意此事言路如李清沈肩培戴明說諸公極力聳之疏請再三又因同難諸後人之陳乞嚴旨催覆時宗伯林欲楫祠司吳康侯於卹忠大典漠不關心亦不知諸君子之始末但憑胥吏呈稿至以未諡周繆二公爲已諡又以不在慘死

之列如丁乾學者亦混入焉因奉核議實據之旨遂終於見格矣此沈公面語遜之云然弘光時復賴李沈二公疏催宗伯管公紹寧疏請乃得全給一代褒忠之典始大備矣

八月十九日早朝畢上即登文昭閣閣在皇極殿東上步下閣御德政殿召五閣臣言文昭閣兩旁可建直房朕不時召對及講讀偶有疑問先生每往來亦便宋人言親賢士大夫之時多親宦官官妾之時少又問永樂大典及大學用人理財諸臣各有奏對上因言京中宜積貯本色又言屯田也是要緊又言漕運海運諸事黃河一帶修築如何德璟對自董家河起即用泃河不用黃河一路較平穩上言京中運糧車戶之苦德璟對車戶腳價原有輕齎銀可用只須給發外面百姓尤苦練餉之加須是漸漸減省上默然翌日命於文昭閣左右各設直房云

八月廿四日講讀畢上召五輔臣入文華後殿手執一本問張溥張采何如人延儒對讀書的好秀才上曰張溥已死張采小官科道官如何說他好延儒對他胸中頗有書會做文章科道官做秀才時見其文章又以其用未竟而惜之上曰亦不免偏延儒曰張溥黃道周皆有些偏只是會讀書所以人人惜他上默然德璟曰道周前日蒙放他極感聖恩只是永遠充軍家貧子幼還望天恩赦宥上微笑延儒曰道周在獄中尙寫許多書即在前章奏俱是親筆寫的德璟曰道周寫有孝經一百本每本必有一篇文字多是感頌聖恩景昉言皇上表章孝經所以道周寫本內有聖德頌極感聖恩演言他事親亦極孝德璟言皇上問知樂之人即道周便能知樂甞言道周無不博通且極清苦德璟言道周子方十歲但得免其永戍便好延儒言道周也不在永戍不永戍就是讀書也還用得上不答但微笑而已翌日遂奉手敕云昨先生面奏黃道周清操博學見今戍遠子幼朕心不覺憐憫彼先偏迂經此一番懲創想亦改悔人才當惜作何赦罪酌用先生每密奏來輔臣具揭奏復即奉御批准赦罪復原官諭吏兵二部一時臣民無不鼓

舞以為聖主轉圜之美而宜興之異言匡君亦其一端已
 九月十八日御日講講論語子罕言節上召輔臣問夫子論仁如
 欲立欲達克己復禮天下歸仁及出門使民等章言仁儘多何云
 罕言延儒對言此卽性與天道不可得而聞之意德璟對聖人未
 嘗不言及門弟子悟者以為言不悟者以為不言耳又問命與仁
 如何分別德璟對只是一理在天為命在心為仁又問一日克復
 天下歸仁便是修己以安百姓意諸臣言聖見極明徹延儒言帝
 王學問只是明德新民德璟言明明德於天下便是天下歸仁頃
 之諸臣言及起廢事舉葉廷秀成勇最有清望上頷之又諭孟冬
 祭太廟宜用何時德璟對會典原無定時上因商子丑二時德璟
 對古祭禮只言質明厥明似用寅時為妥
 講畢上與閣臣議東宮移宮事出黃匣內欽定宮屬條約八款皆
 御筆也首款離開親親上因言潛邸孤危情事且指誑嚇給誘四
 字云中難盡言時方有選九嬪之旨又東宮年當選婚故議移居

於外然婚尚未選又方在嚴冬德璟因微言天氣寒凍牲卽繼之
 云天氣正寒稍緩如何上曰卽俟二三月不妨未幾罷選嬪東宮
 因亦不遷

皇極門外兩廡四十八間除曠八間實四十間東二十間為實錄
 玉牒諸館及東閣會坐公揖處西二十間上十間為諸王館下十
 間為會典諸館定王書房在西第六間第五間懸先師畫像四配
 侍側及永王出閣移定王於第四間永王於第六間王初出向先
 師四拜三叩頭以後一拜三叩頭第三間第七間為二王退居處
 餘三間則大璫內閣講官會集處也定王中宮周后出辛巳受封
 年方十歲壬午正月出閣永王東宮田妃出壬午受封年亦十歲
 癸未八月出閣皆命選新進士為簡討助教等官為待詔充講讀
 以兩房兩殿中書充侍書故事初開館內閣連到三日提調講讀
 以後不復到上愛諸王令隔一日則輪一閣臣提調初開讀行四
 拜禮以後一拜不叩頭讀四書書經各五遍講四書書經各二遍

用酒飯畢再入侍王寫做閣臣至案前觀王新寫十字餘俟諸臣退後寫足送閣閣臣批圈進呈御覽

詔誅兵部尚書陳新甲新甲起家乙科由邊道升巡撫丁憂楊嗣昌薦其才奪情起宣大總督嗣昌入閣繼任中樞者為傅宗龍宗龍既得罪遂升新甲為大司馬附嗣昌力主款議當張若麒督戰敗逃後特遣馬紹愉往義州議款竟得媾書紹愉幾被殺匍匐歸臺省惡其辱國交章發新甲奸狀上雖怒隱忍未即發適新甲有疏細陳款事中多援引聖諭此疏誤為書役發科鈔傳兵科據疏糾參上意新甲見賣嚴旨切責回話新甲回奏絕不引罪反自誦其功有某事人以為功而實臣之大罪等語上大怒著刑部提問部引失陷城寨律秋後處決左右有為營解者以虜未薄城為言上曰辱僂我七新藩不更甚薄城乎下部再議司寇徐石麒因言新甲陷邊城四陷腹城七十二陷新藩七此從來失事未有之奇禍亦刑書所不忍載之條例者也當照臨敵缺乏不依期進兵

策應因而失誤軍機者斬決不待時旨下即會官處決

左都御史劉宗周到任上言六事一曰建道揆京師首善之地先臣馮從吾立首善書院請復之以昭聖明致治之本一曰貞法守高皇帝焚錦衣刑具一切獄詞專聽法司不必下錦衣并請罷東廠緝事一曰崇國體大臣自三品而上犯罪者宜令九卿科道會詳之乃付司寇司寇擬辟乃得收繫此於僂辱之中不忘禮遇之意一曰清伏奸凡禁地匿名文書一切立毀一曰懲官邪京師士大夫與外官交際愈多愈巧彈劾之後惟祈嚴斷一曰飭吏治吏治之敗無如催科火耗詞訟贖緩已為常例矣朝廷頒一令一令即為輿躐之始地方有一事一事即為科斂之藉至於營升謝薦巡方尤甚請以風憲受贓之律為科道考核之第一義上嘉納之未幾有武英殿中書王育民謁宗周於私寓出員外郎孫順所餽金宗周自劾逮育民下刑部究問

贈故輔臣文震孟禮部尚書詹事姚希孟禮部右侍郎各廕一子

入監給予應得祭葬震孟以日講受知特簡入閣爲溫體仁構誣疏參閒住亡後溫又在事撫按不敢具題戊寅年吏科吳麟徵有疏言之韓城擬票卹典出自朝廷何得徇私市恩御筆抹去止票該部知道希孟以鄉闈事謫南先震孟一月亡撫按以舊講官例爲之疏請部覆如例議卹時張至發當國票旨以駢語四六新經申飭疏語違式議處撫按部科各官而寢其所請至是已越四年莫敢言及矣宜興當國方博采公論以收輿望遂從部覆得如例予卹云

十月初八日北兵大舉分三道從牆子路入東界嶺青山卽破遷安三河通州薊州等處各分道一往真定一往河間一至香河又分別部破臨清等處抵山東兗州執魯王索金王不勝辱自縊死信陽王及監軍道于維新知府鄧藩錫推官李昌期滋陽知縣郝魯聲副將丁文明俱死之又破萊陽鄉紳侍郎宋玫吏部員外宋應亨中書趙士驥俱被執不屈死事聞上御中左門召百官誠諭

數百言深自引咎諸臣皆叩頭謝罪次日下詔罪己曰比者災傷頻仍干戈擾攘興思禍變罪在朕躬勿敢自寬敬於宮中默告上帝修省戴罪視事勳戚文武諸司等官有奏事者赴弘政門報名候旨

自十月至次年四月北兵方始出口所破城邑自薊通等處直至山東一帶無不被蹂躪者己巳以來四次警變未有甚於此番者也

行人司副熊開元因見上罪己求言詔卽疏求獨對上因召入德政殿開元請屏輔臣退然後有言上曰輔臣原管密勿可以不退開元奏皇上聖不自聖求賢自輔使大臣皆以皇上之方寸爲方寸天下太平矣又奏見賢焉然後用之等語上曰見字最重要見如何是賢開元奏庸人在高位相繼爲奸迨言官發其罪而誅之所敗壞已不可救上云多事之秋責備人主責備輔臣是大題目又云軍興旁午多有小人挾私罔上爾必有私意開元奏臣如有

私乞敕輔臣面奏上因令補奏言昔日輔臣繁刑重斂屏棄忠良
故人得而攻之今日輔臣奉行德意釋纍蠲逋起廢賢才皆其所
引用偶有不平私相慨歎而已孰復起而攻之若皇上不加體察
一時將吏狃於賄賂雖失地喪師皆得無罪誰復爲皇上捐軀報
國者疏入大怒批旨以其讒譖輔弼狡託機密著錦衣衛拏問
給事中姜埰疏言皇上修省罪己于言官諄諄致戒豈有厭薄之
心哉言官持論太急亡當聖心此言官之過也聖諭所云代人規
卸爲人出脫者皇上何所見而云然乎於章奏知之乎抑出於聖
心之懸揣乎今如二十四氣之蜚語必大奸巨慝惡言官之不利
於己而無以中之不激皇上之怒不能鉗言官之口人將爭效寒
蟬誰復爲皇上言之者時有投匿名文書詆各臣爲二十四氣者
故埰疏及之上大怒命送錦衣衛打問與開元同日下獄已而以
廷臣救重下嚴旨并責錦衣衛溺職著再行嚴訊打問再四讞上
下刑部議罪司寇徐石麒議坐二人配贖聖旨以不具招罪司官

石麒閒住該司劉沂春革職開元埰各廷杖一百仍發刑部議罪
再問再駁繫獄年餘至十七年二月始各允遣戍放歸

熊公自序略云二十九日召對旣罪劉宗周等獨諭金吾駱養
性曰熊開元必有主使不行拷訊是汝不忠駱出方沈吟道上
中使忽以手救至則令取開元埰畢命以病聞密詔也駱失色
語同列同列曰是何可殺璫黨亂政時田爾耕斃諸言者足鑒
矣明日十二月朔取開元百端拷掠求主者但舉一腔忠憤及
姻朋輩私相感歎挽開元勿語者以對先一撻一百敲又一夾
打五十擗掠至垂斃始還獄初二日又一夾打五十擗復去衣
打五十棍自分死矣金吾法已窮思之三日似有鬼神之通乃
以所讞無大礙於首輔者爲一紙開元所供媿媿干言爲一紙
同進并繳前密諭曰誠如聖諭天下祇畏臣衙門之刑不畏朝
廷之法合無將開元發部擬罪肆諸市朝始可昭垂後世初四
日上以讞詞發閣延儒叩首曰熊開元南人不任刑今已至矣

願付刑曹上用其言下部且手詔答金吾曰開元塚前詔不必行始驚且喜呼聖明也刑部疏上以不審不招爲欺藐玩徇責堂司官開元塚各杖一百開元已抵夜臺再四稍有人心莫不淚落而科道廖國遴語同官曹良直以緩死之故良直卽疏言金吾漏泄機密歸功於己歸過於君毒哉此舉雖磔金吾不足贖罪何況開元上忽召金吾諭曰外廷有人言汝金吾曰不識言臣何事上曰言熊開元事汝漏泄機密金吾曰臣盜不明利害何敢泄漏且臣西班不與東班往還何處漏泄但開元屬臣問姜埰屬鎮撫司問臣奉詔不得不聞於該司吳邦輔邦輔弟邦臣見官御史或與邦臣商遂聞於外歟上曰朕今亦不究矣嗟乎人皆一死開元獨千百死非至尊弘宥能免茲辣手乎

閏十一月二十九日召對百官議督撫去留事畢諭科道官來吏科都吳麟徵首爲姜埰求寬上曰目今□人已及兩月任其焚掠慘不必言時聖容惻然且垂涕言曰朕無面目見爾等爾等言官

當言的不言二十四氣之說事同匿名屢見章奏不得不於姜埰疏上一問言官爲朝廷耳目如己不正何能正人麟徵奏熊開元亦以訐奏輔臣得罪諺云家貧思賢妻國亂思良相封疆敗壞豈得不責備首輔總是姜埰出語不倫開元亦是熱腸上曰開元假託機密陰行讒譖漸不可長前旨已明各科道俱有奏對言督撫封疆諸事御史楊若橋舉西洋人湯若望製火礮禦敵左都劉宗周奏國之大事以仁義爲本若望向來創說邪教堂堂中國若用其小技以禦敵豈不貽笑上曰火器是中國長技若望比不得外夷宗周奏若望小技何益成敗目今要慎選督撫若文官不要錢武官不怕死何愁不太平只說選才望不論操守使貪使詐貽禍不小因言范志完操守不好貪剋冒兵以致軍心渙散又奏朝廷待言官宜有體卽有罪乞下法司今熊開元姜埰因言下詔獄大於國體有傷又言臣宗周前亦因言得罪荷皇上優容臣何幸而遇上恩二臣何不幸而不蒙寬宥又如黃道周言語激烈有朋友

不能堪者皇上既待以不死又蒙起廢二臣慤直不如道周道周何幸而遇恩二臣何不幸而不蒙寬宥上曰三法司錦衣衛俱是朝廷衙門你說待言官有體假使貪贓壞法欺君罔上通不該問了宗周伏地引罪上曰黃道周聞他有學有守用係特恩恁得引他比例似你復拗偏迂成何都察院卿等起來劉宗周候旨處分輔臣同出班跪爲宗周求寬禮尙林欲楫刑尙徐石麒工尙范景文兵尙張國維兵侍馮元飈亦皆跪求上曰熊開元這疏定有主使想是劉宗周主使了僉都金光宸奏宗周賦性硜直客也不會與開元不相往來臣與同官極知他在衙門百事整頓老成可念上曰金光宸也著議處己而五府勳臣同出班跪求寬宥上曰面諭甚明卿等不必申救宗周光宸先出候旨諸臣各退上召輔臣再入隨傳旨劉宗周革職刑部議罪閣臣持不發將原旨同奉至御前跪奏力救首輔延儒言之甚緩上不許德璟奏昔唐太宗惡魏徵直諫幾欲殺他入宮尙謂須殺此田舍翁皇后具服稱賀曰

君仁則臣直語未畢上遽曰唐太宗我所不如若閨門德行朕亦不學他德璟奏皇上是堯舜安肯學唐太宗只唐太宗巧於取名上曰如何巧於取名德璟對人臣敢言的用之則名在人主罪之則名在臣下太宗本不喜魏徵故優容他以自成其名上意頗回諸輔臣復緩救之上舉筆抹去刑部議罪四字

冢宰鄭三俊上直言可惜疏曰劉宗周與臣出處略同迂愚每足賈罪於明時拙誠亦恆見原於君父昔年罷棄分正首邱今春起廢忽動聖懷其特達蒙知一也自入朝端獨行踽步華年茂質者相率視爲朽人同流合汙者又爭目爲怪物羣猜滿庭冰炭難入其憂讒畏譏又一也司寇徐石麒疏曰魯論古者民有三疾三疾之中矜愚居二矜者不必皆廉廉者必矜愚者不必皆直直者必愚故孔子思之今劉宗周兼有此二者其矜愚可厭其廉直可思皇上欲求變通趨時之臣舉朝不乏若欲求廉頑立懦維風易俗之臣舍宗周無與歸矣及今用之尙可收其後效自茲以往耄矣

已矣欲再見此正襟危度巖巖冷冷之老臣不可得矣時有舉人祝淵上疏請用宗周命下刑部議罪

副院張瑋疏參極貪御史王志舉前按蘇松惟贓贖是求郡縣伺富戶緣飾贓款以供其意每一訪犯贖積盈千讞上又加五六百兩不等京師紬鋪多本地巨商召各商寫會票十餘萬金不脛而走其家復捆載輜重揚揚入都至今述其婪橫之迹猶人人切齒又舉極廉御史成勇時二人皆以參樞輔得罪然立身既殊起會各別在勇直抒所見可謂拂士之科志舉自知公論不容止如奸人之蓋醜而已奉旨志舉提問勇部議起用

十六年癸未正月當大計外吏二月當會試取士以邊警阻隔外官入覲與舉人會試者俱不得前乃改五月大計八月會試九月廷試屆期欽命井研陳演通州魏藻德爲主考官通州係庚辰科進士不三年卽入閣又越同事三人爲副考皆出特簡云
三月改禮部郎中吳昌時爲吏部文選司郎中昌時好結納宜興

之再召實昌時奔走效力居多至是出入幕中與將吏探聽閣中消息在外招搖市權而醉心吏部謂誠一日作吏部郎卽死可不恨宜興亦欲借此塞其望而遠之及入吏部而愈不可遠先是鄭三俊嘗問徐石麒曰昌時何如人石麒曰君子也蓋畏其機深故譽之三俊不悟往時科道年例在二八月科一人道一人昌時爲政特廣其數例轉科臣范士髦等四人御史陳蓋等八人科道羣起大譁掌科吳麟徵掌道郝彪佳率同官面折之昌時怙過自如科道皆惡之矣又宜興自恃聖眷忽視同官同官咸愠之而罷內操撤廠衛諸事皆內監所不喜司禮王之心嘗告宜興云我輩才力有限望老先生包容宜興不以爲意及以督師出誤信門生范志完之大言一以軍情委之迄無成功上方時時遣人偵候於是左右之譖入而禍不可解矣

上諭內閣楚寇披猖朕當親討次輔吳牲仰體朕意命以原官兼兵部尚書督師勦寇特賜尙方劔以重事權加賜銀蟒等項以示

眷禮又給銀五萬銀牌銀花等項充犒賞之用
四月上諭首輔周延儒卿以元臣自請行邊星馳就道深可嘉尙
特賜軍前賞功銀十萬兩銀幣各項俱全又特賜手諭云卿以原
官督師關寧薊密昌宣通津保東一切督撫鎮將主客兵馬并京
營兵將悉聽節制重者竟以軍法從事有功的立行升賞仍著兵
科方士亮職方尹民興隨行監紀功罪不時馳報卿股肱元輔方
倚賴匡勦不忍暫離左右周召虎奉命專征唐裴度朝天奏凱名
高青史千古同符指日成功星馳入閣慰朕側席仁望之意時北
兵將出口宜興得諭卽行而興化先奉命討賊者尙遲回未出旋
奉上諭曰輔臣吳甡奉命督師三月以來遷延不前將出都門籌
畫不固若在行閒何以致勝還宜在閣料理不必督師因具疏請
罪卽奉旨著致仕未幾與宜興相繼遣緹騎逮問南兵部尙書史
可法有疏申救得免死遣戍

北兵以十月初八日入口由薊通直至山東於三月初入莒州

城養馬休息京師寂然無警矣四月初一赤羽忽自南來舉朝
復大驚初五日上御平臺召三閣臣詞氣甚厲云朕欲親征首
揆周跪云臣願代往上仰面上視搖首不言周起陳演跪云首
揆閣務殷繁臣願去上搖首如故陳起蔣德璟跪云臣可去上
復如前蔣起周再跪請行上回顧冷笑曰先生果願往朕在宮
中看過奇門正在此刻一出朝門直向東門行慎勿轉西知首揆寓
在當時一無料理不得不謝恩而出至齊化門權宿城樓題請
隨征官及勤王已到四鎮劉澤清唐通周遇吉黃得功初六日
至通駐札北返勁兵東起津門西至涿鹿互三百餘里車載騾
駝橫排擁擠遠近礮聲日夜不絕首揆在通州與四鎮暨隨征
各官一無事事惟內驚面諭之諄切外驚出口之驕嘶近憂通
城之脆薄及兵將之寡弱而已五月初六日烽火頓息各處解
嚴都城諸文武再慶太平越四日還朝爲初十日午卽入文華
殿朝見上歡迎親手扶握慰勞倍至告假休沐不允十五日賜

閣臣羊酒陳蔣二相疏辭謂伴食方負慚遂收成命首輔亦疏辭竟同允准十八日諭吏禮兵三部查閣臣視師凱旋優禮之宴何如隆重各進兩儀俱駁情理未盡廿三日傳府部九卿申刻平臺候旨接出聖諭首輔周延儒朕所敬信不謂亦有蒙蔽著議處逾日議處疏上旨下猶予致仕賜路費銀百兩後參疏日甚向之最相暱者出詞更毒如袁彭年之輩皆各自爲地急自別其非周黨也蔣拱宸朋比爲奸一疏參昌時贓款多實七月廿五日上御中左門親讞昌時事詳即日遣緹騎逮首揆十月十八日抵京自疏願戍衝邊不報舉朝亦無敢有下援救語者矣

五月以倪元璐爲戶部尙書仍兼翰林院學士故事浙人不爲戶部又以儒臣改任皆破格也上召對面諭嘉其志念忠誠才猷敏練論奏井井有條又諭曰帝王用才致治原只一二人周之七友漢之三傑卽太祖所用文臣亦不過劉宋數人耳又諭祖制不用

浙人爲戶部今用人爲急只得通融又諭以餉不清則兵不强民不安今以安民爲本元璐曰臣本無能今皇上必欲臣做臣有三做一實做與兵部合算必能準餉以權兵準兵以權餉一大做求民間大利大害一舉興除不以小小生節徒然報數一正做以仁義爲根本禮樂爲權輿政有厲民者罷之必爲民請命上曰有學問之言旣受事與兵部尙書馮元颺互稽兵籍卽以戶部一司官兼職方俾得察核諸鎮將士有崇明人沈廷揚獻海運策元璐奏請試行乃以廟灣船六隻聽運進月餘廷揚見元璐元璐驚曰我已奏聞上謂公去矣何尙在此廷揚曰已去來矣運已至元璐又驚喜奏聞上上亦喜命酌議乃議每歲糧船漕與海各相半行焉至甲申二月首輔陳演以元璐詞臣不達錢穀奏上命罷司農任仍還講幄三月之變從容自縊死璐解任後吳履中繼之五月十六日上御皇極門召閣臣及吏戶兵掌印官兵科都給事中跪出手敕欽定督撫去畱云薊遼只須總督一員擇敏練幹才

任之遼撫一員黎玉田鎮臣一員吳三桂專任關寧勦寇山永撫臣一員李希沈照舊鎮臣一員盧天福是否堪任著另推簡密不必分作二鎮但著順撫三屯鎮管轄卽著王繼謨唐通料理督師保督俱不必設呂大器趙維岳回京另用保撫徐標新任可用鎮臣另推通州只設鎮照舊以副將統領其餘要害須派明設信守防先時有備不致臨事張皇時以督撫增設太多因議裁汰赫然整頓一新然總兵贅濫數員副參以下尤多皆未及汰大抵樞輔以此爲交結納賄地雖屢經票擬駁催亦置之高閣此邊事敗壞大病根也

上召保定巡撫徐標入對標曰臣自江淮來數千里見城無完固蕩然一空卽有完城僅餘四壁蓬蒿雞犬無聲曾未遇□□者土地人民如今有幾皇上亦何以致治乎上欬噓泣下標又曰天下以邊疆爲門戶門戶固則堂奧安其要莫若修內治重守令守令賢則政簡刑清而盜自息上曰諸臣不實心任事以至於此皆朕

之罪標又言車戰墾田上善之標四月己卯受事辛卯陞見賜金幣至是復召蓋上深憫畿民欲得其詳也標在任能殫力任事甲申春大寇臨城竭節固守知府邱茂華先已通賊輸款標執之下獄親自登城畫策守禦而叛兵劫標殺之出茂華於獄遂檄屬縣俱叛於寇

命孫傳庭特加督師總制應鳳江楚豫州勦寇軍務兼總督三邊兵部尙書呂大器以兵部侍郎總督江楚應皖等處軍務各給以行閒賞功銀幣等項差官星夜解至軍前聽用懸賞格擒斬闖賊李自成賞萬金爵通侯擒斬張獻忠賞五千兩官一品世錦衣指揮使

六月癸亥朔戮叛帥劉超劉越各凌遲傳首九邊妻子給付功臣爲奴財產入官舊制朔望停刑時以超等拷問垂斃改初一日辰時祭告午時獻俘上御皇極門兵部行獻俘禮百官致詞稱賀超永城人申河南武解元跛而知書爲貴州總兵坐罪免後上疏言

兵事中樞陳新甲起爲河南總兵以私怨殺御史魏景錡舉人喬明楷生員王奇珍三家百餘人遂據城稱叛巡撫王漢奉密旨討之爲兵部所洩漢率兵至反爲所殺執永城鄉紳丁魁楚練國事等追令上疏保之未幾鳳督馬士英合兵圍討超困出降解赴京師正法獻俘時於闕下大聲呼冤枉者三上不問

七月初十日上召山東武德道僉事雷演祚來中左門命該三法司錦衣衛刑科掌印官提范志完門外伺候先是演祚疏言志完兩年僉事遽陟督師不聞知兵善戰徒恃行賄躡升非有大黨何以至是方北兵攻德不下去陷臨清越五日而志完始至聞破景州懼欲避入德州城未之許乃託德州大紳謝陞僑寓詞林方拱乾晤臣於南城古廟臣答以援兵非守堞之用督師非入城之官不聞薊州之陷由夷丁內潰乎此臣目覩最真者也若夫座師當朝罔利代庇玉帶明珠懸作市賞撫鎮之囚子部堂臺省半屬頤指氣使之私人稱功頌德徧於班聯君前臣名通廢常禮至於中

樞主計惟喜虛文請餉必餽常例萬金必扣三千兵部則推升有估缺之價敘功憑孔方爲優一則木強昏貪聽司官吏胥作弊一則深揖長跪勾閣部科道免參口猖寇獷惟以添撫添督卸脫推諉徒爲破甑然灰之巧圖何有金城棗祇之實情上覽疏異之命舊計臣李待問傅淑訓樞臣張國維及戶兵科俱議處志完拏解質究隨召演祚入京至是召問演祚前劾志完縱兵淫掠及金銀託方拱乾果否演祚對如前奏因召拱乾入又問演祚稱功頌德徧於班聯是指何人對曰周延儒招權納賄如起廢清獄蠲租俱認爲己功兩次考選收爲門下凡賣巡撫總兵必經幕客董心葵之手又令馮銓之子送物回家上命立逮心葵又問志完逗畱淫掠之狀志完辨無有且曰是日臣在大王莊總兵賈芳名等禦敵乘大風卻之上斥其妄又問吳履中爾察核志完何以履中對如演祚言上曰趙光忭亦逗畱但參志完何以服之命并逮光忭辭敏中而拱乾辨無受賄事上不問

崇禎朝事四
二十六日上御中左門東宮二王左右侍召三法司等官及御史
蔣拱宸郎中吳昌時上問昌時結交廠衛存何意見昌時辨其無
又問馮銓結親受其萬金昌時言行聘從無萬金之理又問數款
皆拱宸疏中所參也昌時一一辨論不服上命夾起將昌時二夾
敲四十折槓二根上疑有弊著錦衣喬可用門外候旨昌時暈絕
而蘇復奏云五案之大法失事必誅行閒之功罪察飾同任東協
失事拱宸何得免脫上問拱宸行閒失事情形拱宸不能答命并
拏下候旨隨下諭云吳昌時大奸巨猾鄭三俊何以破格錄用著
議處張國維職任中樞失事重大侯恂棄汴不援坐糜糧餉俱拏
解來京究問郝炯蔣拱宸方士亮尹民興扶同欺飾并喬可用俱
著法司提問郝蔣以參昌時贓款不實方尹則先奉命隨輔臣出
征者也

諭吏部朕覽輔臣奏嚴禁寓所通謁其於事關職守俱於各衙門
會議或重大機要不妨過東閣密商並不許擅詣私宅投謁送遞

私揭犯者緝糾論斬蓋內閣陳演有揭嚴飭往來也說者謂演如
此自慎不知日後爲闖賊所炙獻多金何來

諭吏部差官召上江漕儲副使方岳貢來京陛見尋以召對稱旨
特升協院左副都未幾卽以原官同李建泰入閣辦事從來閣臣
無僅帶副都御史銜者三百年來惟岳貢一人而已先一日召對
適上詰責吏部某事尙書鄭三俊云臣正行糾駁岳貢云何不卽
行題奏一語深當上意遂得大拜後闖賊破城不早引決竟被刑
辱而死時有給事中時敏部擬例推金華知府託同鄉求援於
方方令急具一條陳疏進來敏卽具一套疏忽奉嚴旨下部議處
衆相訝不解所謂適例推疏上方票旨時敏正當議處何得遽行
升擢員缺另推後議處疏奉旨時敏降三級照舊管事仍儼然掖
垣矣其舞文弄權如此

岳貢以崇禎元年爲松江府守歷十四年不遷同時蘇州府守
陳洪謐則歷八年不遷皆以錢糧不清降罰至二十餘級兩人

於糧務實未精明任吏胥耗蠹不能辨也陳過於仁厚然與民
休息民皆德之方則惟奉要津聲氣日以頌詞作書帕因得延
譽內廷躋位宰輔卒致身名俱敗使不遇國變幾同漢家良二
千石並傳

八月諭刑部瘟疫盛行民間罹災甚慘大小各官都著洗心滌慮
其圖挽回獄中情輕罪犯先行釋放候旨事涉矜疑者作速開結
未幾上召刑部尙書張忻問曰獄中各犯可盡該放否忻曰此時
瘟疫徧行物故者多慘不忍見所以取保放出若失誤封疆者仍
禁不放上曰放也罷了各犯就帶方巾穿色衣在外拜客如熊開
元姜琛尹民興等這等可惡忻出卽拘喚數人還監收禁

時京城瘟疫盛行朝病夕逝人人喘息有全家數十人一夕并
命者上特令張真人建醮祈安而終無驗日中鬼出爲市店家
至有收紙錢者乃各置水一盆於門投銀錢於水以辨真僞民
閒終夜擊銅鐵器聲以驅厲崇聲達九重上不能禁景象蕭條

識者早知有甲申之禍矣

諭內閣禁奢靡止宴樂前已與先生面諭還宜擬旨通飭朕於元
旦冬至春節端陽中秋及諸大典禮升殿方許作樂其餘皆免朕
浣衣減膳已有旨令用錫木器以示儉約金銀各器關典禮者畱
用餘貯庫以備賞賚內外文武諸臣俱宜省約專力辦賊先生每
將先年舊旨再參酌議妥來行

上性儉約常服多用浣衣庚辰秋後以念聖母矢志心齋素用膳
初係金玉自後止用磁漆器袍服大袖止畱尺五寸命閣部大
臣亦以尺五寸爲則辛巳六月瀛國太夫人徐氏言夢皇太后
鑾輿下降笑語如家人請上除齋戒日外不妨量用肉味奉旨聖
母託夢朕心不勝思慕除郊廟祭告遣謁忌辰朔望仍齋戒外
其餘日用常膳於奉先殿收回祭器量用自是始用葷然每當
祭祀散齋七日致齋三日皆出宿文華殿或武英殿俟禮畢始
回宮云

十一月 日刑部奉旨周延儒機械欺蔽比匪營私濫用匪人封疆貽誤屢旨已明所擬豈足蔽辜姑念一品大臣著錦衣衛會同法司于寓所勒令自裁准其棺斂回籍先是部院看議云周延儒召起田閒隆以師保可稱千古殊遇受事之初將順聖明有蠲租起廢解網肆赦諸大政天下想望太平自宜永矢精白仰贊宸猷乃防簡疏於比匪居身涉於營私又云精神慣用之揣摩伎倆總歸於閃爍一時之倖竇日甚狐假公行自誤因以誤國嗟何及矣以大臣受財枉法律擬令發煙瘴地方充軍奉旨勒令自裁蓋出自聖斷云

部院看語略摘數句實中情罪受者當亦心服若如流傳種種至有受賄縱敵之說夫力能殲敵方能縱敵漫坐以莫須有之案有識者俱不以爲然也

同日奉聖諭罪督范志完趙光忭辭敏中失陷封疆著卽會官處決吳昌時把持朝政奸狡百端也著斬決了罷吳姓發雲南金齒

充軍

法司看議云吳昌時徧身鱗甲轉眼戈矛生平伎倆在於依附逢迎晝夜營謀惟是挑構反覆望門依附則改頭換面以呈身入幕求容則舐痔吮癰而獻媚陽爲詭譎反誇作驅除奸黨之功明肆傾排偏矜有護豈正大之力投拜罪輔辭國觀遂覬覦乎考選串通逆案馮銓而假竊其聲靈舊冢臣清執之品自昌時入而銓政亂是累冢臣者昌時也舊輔臣柄政之時自昌時用而議論煩滋是誤輔臣者亦昌時也數語描寫已盡可作昌時小傳也 光忭由兵部任密雲巡撫以劾總監鄧光韶謫戍薊州破日廷臣咸薦其才起任薊遼總督竭家貲以練兵竟與志完同戮識者冤之

張獻忠既破襄陽後破黃安破黃梅癸未正月破蘄州荆王播遷兵備許文岐死之遂陷黃州破麻城從鴨蛋洲渡五月 日破武昌先是賊至江北省中官府皆泄泄無言城守者忽中夜有呼於

街者曰賊至矣闔城男女驚起狂奔至曉寂然未見有賊如是者數夜人皆玩之不以為意及是曉登城望之滿江皆賊船矣兵民一時驚潰賊入城盤踞楚王府搜取庫藏及劫掠紳民無遺以獲輿籠王沈之江屠戮數萬人驅男女數萬人於教場聲言點名衆既集傳令跪上者亂砍跪下者亂箭射死百無一存積屍浮江江水爲赤其未殺者多刖斷手足鑿毀目鼻無一全形獻忠遂僭稱僞號鑄西王之寶稱武昌曰京城僞設六部五府開科取士殿試取三十人爲進士授郡縣官在城各官死難者參將崔文榮與賊格鬪死長史徐學顏爲衆賊斷左臂右手持刀不仆賊支解之鄉紳大學士賀逢聖與文榮守德勝門城陷歸家衣冠向北再拜以巨舟載其家出墩子湖鑿舟全家溺死子覲光明俱夫婦同死逢聖屍沈百七十日不壞至十一月壬子始克斂自此後岳長衡永相繼告陷八月破岳州長沙巡撫劉熙祚長沙推官蔡道憲俱被執不屈殉義最烈別有詳記同時殉難者又有知縣嘉魚王良

鑑鍾祥蕭漢蒲圻曾棡均州胡承熙衡陽張鵬翼興都畱守徐壽崇武昌通判李毓經歷任文熙

上聞闖賊在滎汜密禹之閒嚴令孫傳庭出關相機掃蕩先是賊盤踞楚豫閒有窺關中逼金陵之意廷議催傳庭進剿傳庭故將家子九邊精銳悉隸麾下又據潼關之險初試小勝遂欲一大創之恃高傑爲摧鋒傑不肯用命再三止傳庭勿出秦撫馮師孔數言頓兵久安非朝廷命戰意也且賊日強橫將何所底傳庭不得已以八月二十日出師逼賊賊匿精銳驅殘民誘我屢有斬獲遂以捷聞前行三百餘里賊伏盡起進退失據芻糧不繼兵衆大潰時將士家屬盡在涇原高傑謂潼必不可守莫若收合各兵保西安以固根本傳庭不許曰若退則潰不可止不如聲言進戰使賊聞而遁我可待餉賊偵知之明旦挑精騎壓壘我師卽奔潰器甲山積騎兵悉退入關步卒後至賊尾之獲所棄甲仗甚衆乃僞爲步卒裝雜入關關內伏兵既多礮聲一响關門卽開時九月初六

日也諸帥倉皇四散西安人王根子私降賊縱賊大入道臣楊王休布政陸之祺以下皆降西安遂陷傳庭方在關上爲所留西番喇嘛僧二百餘擁之西行死於亂兵自傳庭死而秦地悉陷遂破榆林入太原直逼京師矣一時殉難死節者省城則巡撫馮師孔按察司王綱長安知縣吳從義渭南知縣楊暄商雒則道臣黃世清蒲城知縣朱一統商州鄉官則原任尙書南企仲誥封副都御史朱崇德原任巡撫焦源清焦源溥御史王道純參政田時震主事南居業蒲城鄉官則副使祝萬齡咸寧舉人朱誼泉中部知縣則朱新懋有一未配妾亦投繯死都司吏邱從周亦罵賊死

孫公以將種奮跡甲科由知縣升吏部有吏才崇禎七年任陝西巡撫禦賊有功卽遷保定總督以同事不相能稱病求去言官論其卸責誤事革職下獄張獻忠旣降復叛楊嗣昌失事自盡傅宗龍汪喬年相繼敗死孫從獄中請討賊自贖乃復官總督勦寇初奉密諭斬賀人龍撫其部衆分將領之誓師出關頗

有成畫方捷報至京廷臣動色相賀未幾而敗報踵至矣考其所由皆馮撫趨之又是時熊給事人霖方奉使在秦亦責以奉命討賊宜速進毋退不得已徼倖一出竟至於敗嗟乎國之將亡神奪其鑿四路出師決於紅旗之踵至松杏敗績成於職方之坐催潼關不守陷於熊馮之讜論遂至於一敗塗地中原爲墟是誰之咎歟然而馮卒能盡職熊於國亡之後亦航海全節而死悉可免後人之苛論矣

自成自初起至是剽掠十餘年旣席捲楚豫始有大志然地面通皆戰場所郡縣官軍旋復之旣奄有全秦百二山河遂不可制自成據秦府僞授秦王存樞權將軍世子妃劉氏曰國破家亡願求一死自成遣歸外家秦藩富甲天下賊之犯秦也戶部尙書倪元璐奏曰天下諸藩無如秦晉山險用武地也宜諭兩藩能任殺賊不妨假以大將之權如不知兵宜悉輸所有與其齎盜何如餉軍賊平之後益封兩藩各一子如新王例亦足以報之兩王獨不

鑒十一宗之禍乎賢王忠而熟於計必知所處矣書上不省賊初專事殺掠牛金星勸以不嗜殺於是禁戢其下民間安堵遂改西安府爲長安府

自潼關旣破賊乘勝長驅如入無人之境京師大震廷議以兵部侍郎余應桂爲總督命御史霍達爲監軍十一月初三日上召對諭應桂曰逆寇入秦特命前往早平狂寇早安萬民有真勦然後有真撫有好將然後有好兵有好有司自然有好百姓在爾實心去做應桂再三稱難言賊已入關州縣瓦解所發臣兵三萬及糧餉尙無實著陝西旣爲賊所蹂躪本地糧餉如何追徵所撥川餉亦隔省爲梗上呼戶臣倪元璐問該部何以應之元璐奏懷慶見貯有餉銀十五萬又司官劉邦弼催到十萬又贖有五萬秦中勦餉原額七十餘萬如西安未破憑該督設法督催接應應桂奏催餉已難只有山西就近可以接濟元璐奏山西近京只有此項可濟邊需不敢輕許上曰也要撥些與他應桂奏要幾員好將官上

呼署兵部張伯鯨諭宜選兩員與他伯鯨奏他討馬岱已推保鎮尤翟文已回止有孫獻捷見在京營應桂奏原任保鎮姜瑄以通賄薊鎮薛敏中以失事二人可用上不許著另推呼霍達命作速前去料理霍達奏昨據按臣金毓峒報孫傳庭不知下落按臣馮師孔西走未知存亡如有兵有餉臣不惜一死以報皇上無兵無餉空死無濟因慟哭伏地上許其熟練地形實心任事今照諭內事有功破格賞升上命閣臣擬諭頒給銀幣紵絹各項爲犒賞用又令御馬監撥馬數十匹與家丁騎坐令兵部速選將官同去又命吏部李遇知察邊撫宜易者因易甘肅巡撫林日瑞云時賊已入關方推秦督無肯行者上謂罪廢諸臣原以知兵舉何至今推督撫便若無人聖意蓋有所指應桂亦其一也部中不得已推之然實非邊料上特賜宴於中左門直房令閣臣侍宴應桂得命後日夜悲泣勉出都門則僞官充斥赴任無地矣

是時朝無確報相率自愚莫有以賊在意者閣中票旨但云以

匹馬不入爲功兵部議兵但云以死報國未聞作何料理上下相蒙馴至敗亡莫之省也

李自成既破西安遂破延安破鳳翔以達榆林兵備副使都任及總兵王世顯侯世祿侯拱極尤世威惠顯李昌齡尤翟文等斂各堡精銳入鎮城大集將士問之曰若等守乎否乎各言效死無二遂推世威爲長主號令繕甲兵賊遣僞官說降不聽賊怒環四面攻之城上強弩疊射殺賊無算賊稍卻已復益兵力攻逾旬不克賊以衝車環城穴之城崩數十丈賊稍入城遂陷都任合室自經死尤世威縱火焚其家百餘口揮戈突戰死諸將各率所部巷戰殺賊千計賊大至殺傷殆盡無一降者合城婦女俱自盡文武將吏以及士民死者數萬人榆林爲天下勁兵處頻年缺陷軍士飢困而殫義殉城志不少挫榆林既屠賊擣寧夏總兵官撫民迎降三邊俱沒賊無後顧長驅而東矣攻慶陽城守不支遂陷執韓王兵備段復興知府董琬鄉紳太常少卿麻僖俱死之已復遣賊陷

甘州賊渡河莊浪涼州二衛俱降遂圍甘州巡撫甘肅林日瑞已奉旨罷職尙未離任同總兵郭天吉同知藍臺等並以力屈死之居民四萬七千餘人西寧堅守不下至明年二月詐降殺僞官賀錦等

張獻忠既破武昌隨返兵破長沙一路至四川陷涪州瀘州圍佛圖關進圍重慶悉力拒守四月而陷瑞王闔宮被難舊撫陳士奇知府王行儉皆死之賊屠重慶取丁壯萬餘刳耳鼻斷右手驅至各州縣兵至不降者視此爲例但能殺王官府吏封府庫以待則秋毫無犯由是所至官民自亂無不解甲投降者進陷成都蜀王亦合宮被難巡撫龍文光及道府各官皆死之姓名不能詳紀所知者惟推官劉士斗華陽知縣沈雲祚仁壽知縣顧繩貽成都知縣吳繼善繼善一門四十餘口皆同日并命爲尤慘云獻忠大索全蜀鄉紳至成都皆殺之既而出榜試士諸生遠近爭赴獻忠以兵圍之擊殺數千人皆挾紙握筆以死蜀中士類俱盡復大殺百

姓全蜀數千里蕭條絕無人跡蓋甲申年秋冬事也中原多故獻忠遂奄有兩川李自成敗後益發兵攻漢中陷之獻忠遂巡自守不敢出來未幾獻忠以病死於蜀以養子孫可望嗣領其眾焉當時破京師弑君后者闖之罪惡實甚於獻而蹂躪楚蜀殺人盈野者獻之暴虐尤甚於闖蓋天實生此二賊以亂天下跡其所爲固多史冊以來所不經見之事近婁吳梅村先生記兩寇始末頗詳茲不具述

上念宣鎮陵京藩屏援勦必先以馬缺發御前銀三萬給鎮臣唐鈺令市馬閣臣蔣德璟奏言該鎮買馬額銀兵部歲發不貲未見作何收買茲復另發旣非例且恐鈺復浪費一擲也上不聽未幾大同山海各鎮臣引例討御前銀買馬上思璟言不復發鈺以宣淫爲宣督王繼謨參提前銀竟不可問

吏部文選司兵部職方司爲用人之地歷任正郎多不能副上意因特起原任太常少卿沈自彰以原官管文選事原任四川布政張法孔以太僕少卿管職方事沈係辛丑科由縣令歷任部曹府道以天啟年布政升常少崇禎元年致仕張係庚戌科由戶部歷任司道丁丑年以四川布政考察革職茲忽以陳方二輔薦特起廢籍改授吏兵部司官皆未有之異事也到任未久卽遭國變不能殉節爲賊夾辱而死

浙粵二鎮缺已一年因營求者多相持久不推有大璫王之心之弟之仁久欲得之兵部堂司引嫌置爲緩局以致蜚語上聞特召職方郎王永積入德政殿詰其不推之故永積以邊鎮方急未暇推及內地爲對亦實語也上怒鐫其官實欲出此缺以予新職方也有大力者亦果得二鎮以去

十七年正月大風霾占曰風從乾起主暴兵破城鳳陽地震闖賊李自成稱王於西安僭國號曰順改元永昌以牛金星爲僞丞相立六政府尙書等僞官恣掠河東河津稷山滎河絳州一路遣僞牌投於兵部言三月十日至會同館繳兵部執牌者訊之則京師

人自涿州還值逆旅客與十金代投以爲詐斬之
宮中向有密室累朝不開至是上忽欲開視大璫固諫不聽開進
見空房三閒中惟小紅箱一隻啟視之有小畫三軸其一畫文武
百官俱手執朝冠披髮亂走狀上曰此殆言官多法亂耶其一畫
兵將倒戈棄甲窮民負襁奔逃狀上曰此是軍民背叛耶其第三
軸止畫有一人短衣跣足披髮中懸儼然御容也羣璫相顧失色
上爲憮然而出

吏科吳麟徵疏請棄山海關外寧遠前屯二城檄吳三桂入關屯
宿近郊以衛京師蓋寧遠在關外徒守甚難先年職方趙光怵出
關察核已有此疏議者謂無故棄地不可今當有警徙三桂精兵
入援實要計也上下廷臣議閣臣謂關門兵未可輕調棄地作何
名目持不可且咎麟徵言之失乃不果行三月中警報益急兵部
亦以爲言上獨斷其是內閣乃肯行猶請降旨吳三桂問撤兵事
如何往返經月遂遲師期三桂以二十日抵豐潤京師先以十五

日陷矣

罷兵部尙書馮元颺以原任兵部都給事中
新升添設兵部右侍郎張縉彥代之仍兼翰林院學士

縉彥初任縣令以禦寇有功考選戶曹以召試改翰林時楊嗣昌爲樞輔屬其私人沈迅薦縉彥才改授兵科都給事本欲收爲同黨也縉彥到任卽疏參嗣昌且於召對時言之而議五案大法一疏尤爲嚴切可謂克稱其職矣至是方以科臣起得遂超拜佐部卽正樞席皆出帝心特簡受事未久卽遭大故先旣不能畫一策以濟變後又不能拌一死以報國南渡之日幸借名以復官鼎革之後又反顏而受職究以飾名獲罪禍及身家可不哀哉

元颺與其兄元颺同以文章聲氣名振一時推爲大小馮云颺在諫垣頗多讜論晉任中樞以值時事艱難之秋自知不能勝任故託病堅辭幸得卸責歸未幾卽以病終颺任天津巡撫北

都變後潔身言旋未幾相繼齋志而沒識者悲其所遇之不幸矣

命免金聲逮問授翰林修撰來京陛見聲初任庶吉士己巳之警同劉之綸請纓自效改授御史監軍事平解任養親家居迨寇警練鄉勇以衛地方鳳督馬士英所募黔兵過徽爭鬪失事士英具疏參之奉旨逮問聲亦先具疏辨上察其枉且追念昔年舊勞故有是命并諭追卹之綸云聲是時已丁艱未遑赴召乙酉之變起義不克挺身赴難從容殉節於舊都

正月三十日上召閣臣及吏戶二部臣入文華殿諭吏尙李遇知曰廷臣所舉知兵及清官皆當核實不得濫徇又諭戶部倪元璐曰各邊需餉日急目前卽要措處百萬元璐言外解未到途中梗阻因言浙中東陽土寇之變上曰不必奏卽與輔臣商議措置因取光時亨疏目閣臣曰先生每票擬須體朕意這票內聚斂小人是何人閣臣蔣德璟對曰卽是指練餉部科上曰部科何人璟曰

原任戶部尙書李待問科臣偶記不真上曰朕如何是聚斂當時只欲練兵璟曰既有舊餉五百萬新餉九百餘萬復增出練餉七百十三萬當時部科實不得辭其責且所練兵馬今皆安在上曰倪元璐已并三餉爲一了璟曰戶部雖并三餉爲一州縣追徵只是三餉上怒曰前票孫晉本旣是徇縱這光時亨本內所參何人並不明言這等票擬顯係朋黨璟奏臣孤蹤獨立與二臣並無一面一向在御前說練餉當蠲聚斂之非不是今日方說諸輔臣同李遇知倪元璐皆爲求寬倪止以鈔餉係戶部職掌自引咎上曰起來諸臣承旨退退後璟具揭待罪奉御批朕知道了而鈔餉法已停免練餉亦議裁矣璟連疏求罷至三月初二日始得旨允放仍賜銀幣乘傳云先時有建議行鈔法者鈔背書寫行使姓名五年填滿繳換上以堂印鈐之命侍郎督寶鈔提舉司閣中票擬屢不合旨上於宮中傳鈔式令鑄印二面相連又改五年爲四年云命大學士李建泰出師勦寇二十六日行遣將禮命駙馬都尉萬

煒以特牲告太廟上親御正陽門授建泰節劔備法駕警蹕賜宴
餞之五府掌印侯伯內閣六部都察院掌印官及京營總協侍立
鴻臚贊禮御史糾儀大漢將軍侍衛設宴作樂上親賜建泰御酒
三杯卽以杯賜之慰諭再三曰先生此去如朕親行令內璫爲之
挂紅簪花鼓樂導向方劔而出上目送之又賜手敕有願卿早蕩
寇氛旋師奏凱封侯進爵鼎彝勒銘語官軍旗番十餘萬自午門
排列至正陽門旌旗金鼓甚盛建泰御肩輿行不數武槓折識者
知爲不祥是日大風沙占曰不利行師授進士凌駟職方主事隨
輔臣監軍赦李政修罪軍前效用以郭中傑爲副總兵充中軍旗
鼓西洋人湯若望隨行修火攻水利建泰出都道聞山西烽火甚
急因遲其行日三十里師次涿州營兵逃歸者三千人次東光紳
衿城守不納畱攻三日破之答知縣張弘基殺鄉紳王佐是日卽
移師出城初建泰承上寵命恃有家財可佐軍需後聞家已破進
退失據有逸巡畿內而已

二十九日上傳命工部尙書范景文禮部侍郎邱瑜俱以原官入
閣辦事後城破上崩閣臣中從死者惟景文一人不然黃扉一席
地盡作南冠楚囚矣

李自成陷蒲州及汾州遂以二月初五日薄太原山西巡撫蔡懋
德遣牙將牛勇朱孔訓出戰孔訓傷於礮牛勇陷陣死一軍皆沒
城中奪氣困守兩晝夜初七夜風霾大作初八辰刻風愈烈飛沙
揚塵賊乘風緣梯而上城遂陷懋德先已知不支手寫遺疏付監
紀賈士璋曰君將此疏上聞俾朝廷知今日尙有不逃不降從容
盡節之臣也時緊隨惟中軍應時盛時盛先謂妻孥曰外無救內
難守撫院忠義自矢吾自誓必相從汝輩不若從吾皆爲厲鬼毋
爲賊辱也先將妻妾及一子手刃之次日同撫院被執不屈罵賊
而死同死者布政趙建極守道毛文炳而下共四十六人姓名俱未詳
賊破太原後遂至忻州攻代州薄寧武關總兵周遇吉悉力拒守
殺賊萬餘或言賊勢重可款也遇吉曰戰三日已殺萬賊能勝之

一軍盡爲忠義萬一不支縛我以獻若輩可無恙於是衆心益固會兵少食盡不敵而敗城破猶揮刀力鬪被執磔死遂屠寧武賊遂移檄遠近有云君非甚闇孤立而煬蔽恆多臣盡行私比黨而公忠絕少甚至賄通宮府朝廷之威福日移利入戚紳閭左之脂膏盡竭又云公侯皆食肉執袴而倚爲腹心宦官悉齧糠犬豚而借其耳目獄囚纍纍士無報禮之心征斂重重民有偕亡之恨人讀之無不扼腕憤恨者

上下罪己詔曰朕嗣守鴻緒十有七年深念上帝陟降之威祖宗付託之重宵旦兢惕罔敢怠荒乃者災害頻仍流氛日熾忘累世豢養肆廿載凶殘赦之益驕撫而輒叛甚有受其煽惑頓忘敵愾者朕爲民父母不得而卵翼之民爲朕赤子不得而懷保之坐令秦豫邱墟江楚腥穢罪非朕躬誰任其咎所以使民罹鋒鏑蹈水火殪量以壑骸積成邱者皆朕之過也使民輸芻輓粟居送行齎加賦多無藝之征預徵有稱貸之過者又朕之過也使民室如懸

磬田卒污萊望煙火而無門號冷風而絕命者又朕之過也使民日夜告凶旱潦洊至師旅無處疫厲爲災上千天地之和下叢室家之怨者又朕之過也至於任大臣而不法用小臣而不廉言官首鼠而議不清武將驕懦而功不奏皆由朕撫御失道誠感未孚中夜以思跼踖無地朕自今痛加創艾深省夙愆要在惜人才以培元氣守舊制以息煩囂行不忍之政以收人心蠲額外之科以省民力至於廢罪諸臣有公忠正直廉潔幹才尙堪用者不拘文武吏兵二部確核推用草澤豪傑有恢復一郡一邑者分官世襲功等開疆卽陷沒脅從之流能舍逆返正率衆來歸許赦罪立功能擒闖獻仍予通侯之賞於戲忠君愛國人有同心雪恥除逆誰無公憤尙懷祖宗之厚澤助成底定之大功思克厥愆歷告朕意吏部奏大寇就擒奉旨陳子龍定變可嘉著授兵科給事中先是東陽之變實推許都爲主都故任俠好義遠近信服邑令姚孫棐貪虐殘民假名備亂橫派士民輸金而坐都以萬計都實中人產

勉輸數百自詣告減因有忤適有奸民假中璫言名招兵者於都無涉也事發文致之又摘其所刻社稿姓字謂是結黨謀叛會都葬母賓客咸集負氣者互煽之因發憤舉兵以誅貪吏爲名民怨毒已深旬日之間遂聚衆數萬掠東陽義烏浦江三邑巡按左光先聞變卽調兵行勦民各保寨拒敵官兵大敗子龍時爲紹興推官命之監軍子龍謂都實非反不過爲貪令所激耳令親信齎書往諭都卽率其同事十三人解甲投降子龍爲之請命光先皆不許悉斬之餘黨盡散浙亂以平子龍向以文章名世南渡時爲諫官有聲國變之後謀起大義不克而死

出原任兵部尙書張國維於獄召對中左門命以原官督浙直兵餉國維拜命後知賊信漸迫星夜率數騎南行得不及於難吏科馬嘉植韓如愈等亦借催銀等差並轡而南至山東如愈爲劉澤清差兵殺死于道

國維本浙人在諫垣時能不附同鄉烏程之黨然亦不爲崖異故烏程容之鎮撫蘇松歷七年之久雖無大功績而與民休息民頗頌之至中樞重任本不能勝況值時事多艱前人敗壞之後耶非特科道交章論列有曰深揖打恭便成職業亦略大而忽細也弘光時再任戎政與馬阮不合先幾乞身人謂其愚不可及南都旣覆錢塘畫守卒能竭力盡節一死以畢其事噫亦可以傳矣

召對文華殿上詢左都御史李邦華密奏內云輔臣知而未敢言其試用之語是指何事輔臣陳演封中允李明睿疏及少詹項煜議單上卽簡閱默然蔣德璟奏廷議俱言東宮宜往南京監國上不應次日給事中光時亨卽疏參李明睿南遷爲邪說明睿疏辨上卽召光時亨面詰曰一樣邪說卻只參李明睿何也顯是朋黨姑且不究又曰諸臣平日所言若何今國事至此無一忠臣義士爲朝廷分憂其所謀乃若此耶至三月初四日召對復諭閣臣曰督輔李建泰有疏勸朕南遷國君死社稷朕將何往大學士范景

文左都李邦華襄城伯李國楨請先奉太子撫軍江南光時亨曰奉太子往南諸臣意欲何爲將欲爲唐肅宗靈武故事乎景文等遂不敢言上復問戰守策衆皆默然上歎曰朕非亡國之君諸臣皆亡國之臣也遂拂衣起

嗚呼遷國圖存古人有行之者至於東宮撫軍雖屬權宜實爲要計但遷亦何易言斯時賊鋒已蔓齊魯南北聲息中斷卽出國門能一往無咎哉上之英明早已見及故屢次召對環顧無人不禁徬徨慨歎耳聞曾私語首輔演曰凡事要先生一擔演默不答旣復有朕要做先生偏不要做之語上意可知已此時計復何之惟有斷然守君死社稷之義爲正矣悲哉朕非亡國之君諸臣皆亡國之臣之語也此真千古至恨豈直遺民私痛已哉

詔封各總兵吳三桂平西伯左良玉寧南伯唐通定西伯黃得功靖南伯劉澤清實升一級劉良佐高傑馬岱岳馬科姜瓖孔希貴黃斐葛汝芝高第許定國王乘肩劉芳名李棲鳳曹友義杜允登趙光遠卜從吉楊御蕃等各升署一級各督撫亦分別加升始徵吳三桂王永吉率兵入衛又召唐通劉澤清入澤清前命移鎮彰德因縱兵劫掠臨清南奔通以八千人入壁齊化門外陛見上慰勞倍至尋出內帑十萬命太監杜之秩監其軍通倨傲甚謂上大帥我又以內臣節制我是不敵一奴才也隨奏兵寡賊衆不敵當往居庸關設險以待拜疏卽行不俟朝命旣至居庸卽倒戈降賊矣

命太監高起潛杜勳等分往天津保定眞宣各鎮監軍兵部言各處物力不繼而事權分納反使督撫各官有所藉口上不聽命進魏藻德禮部尙書兼工部尙書文淵閣大學士總督漕運屯練往天津方岳貢戶部兼工部尙書文淵閣大學士總督漕運屯練往濟寧會有言各官不可令出卽潛遁遂止不遣未幾陳演蔣德璟相繼告歸藻德卽爲首輔當演罷之先一日上語演曰朕不要

做的先生偏要做朕要做的先生偏不要做蓋指言南遷及遣兩
輔諸事也

賊犯大同兵民皆欲降命守城眾不應總兵朱三樂自刎巡撫衛
景瑗督糧戶部郎中徐有聲巡道朱家仕俱死之文學朱若葵合
家九人自縊先題曰一門完節李自成入大同殺代府宗室殆盡
畱偽將張天琳守之天琳殺僇凶暴後爲陽和軍民約鎮城軍民
內應殺天琳

賊犯保定督師李建泰已病中軍郭中傑縋城降賊賊入城建泰
被執御史金毓峒守西門賊執之入三皇廟見賊帥毓峒奮拳毆
賊帥仆地躍入井中死妻王氏自經從子振孫以武舉效力行閒
登城射賊多應弦而斃城陷眾解戎衣自匿振孫衣裊襠大呼曰
我金御史姪也賊支解之毓峒子婦陳氏年十八與其祖母張氏
母楊氏嫂常氏盡投於井張抱一孫於懷而下侍婢四人亦同下
時三月廿一日京師已先三日破矣

賊陷陽和遂長驅向宣府宣府叛將白廣恩貽總兵姜瓖書約降
監視太監杜勳緋袍八騶效迎軍民聚謀藉藉巡撫朱之馮獨行
巡城見大礮曰汝曹試發之可殺數百人賊雖殺我無恨矣眾又
不應之馮不得已乃自起然火兵民競挽其手之馮乃奪刀自刎
死軍民遂迎降鄉紳張羅彥自殺

時京師以西諸郡縣望風瓦解將吏或降或遁賊移檄至京寫十
八日至幽州會同館繳京師大震十六日陷昌平州十七日上方
御殿召考選諸臣問裕餉安民策對未及半祕封入上覽之色變
卽起入諸臣立候多時命俱退始知爲昌平失守也是夜賊由沙
河直犯平則門竟夜焚掠火光燭天十八早朝上召對諸臣而泣
俛首書御案十二字以示司禮監王之心卽拭去諸臣方侍班襄
城伯李國楨匹馬馳闕下汗浹沾衣內臣呵止之國楨曰此何時
也君臣卽求相見不可多得矣上召入奏守城軍不用命鞭一人
起一人復卧如故上乃命內臣俱往守城十九日早大雨雨止賊

崇禎朝紀事卷四
攻城礮聲不絕土幸南宮登萬歲山望烽火不絕徘徊踰時回乾
清門殊書諭內閣成國公提督內外諸軍事夾輔東宮時諸閣臣
已出內臣置几上而去上入中宮視后縊畢仍回南宮登萬歲山
之壽皇殿自縊亭新建閣內操處也太監王之心對縊文武諸臣
相隨死難者閣臣范景文而下凡二十餘人另有紀

崇禎朝紀事卷四

右崇禎朝紀事四卷李遜之撰遜之字膚公江陰人李忠毅公應
昇之子篤守家學不求仕進入國朝隱居沒世江陰志不載其
人事蹟亦罕傳所著有李忠毅公年譜見魏叔子文集有三朝野
紀七卷見明史藝文志世所傳舊鈔本及荆駝逸史本均不全此
從京師故家鈔得崇禎一朝爲書四卷較逸史所載崇禎朝不啻
倍之疑逸史系刪節本此則全本也惜仍缺泰昌天啟兩朝無從
補全然以當時之人序當時之事不偏不倚宛曲詳盡在明末野
史中論議最爲持平亦可想見膚公之爲人矣光緒丁酉重陽日
武進盛宣懷跋

